

晚晴籀詩匯

一

二

三

四

五



晚晴移詩匯卷一百二十九目錄

孫超曾 一首

張善恆 三首

于祉燕 四首

安曰潤 二首

李家駿 二首

祝悅霖 三首

殷增 二首

周以豐 一首

周嘉生 一首

盛徵興 三首

馬功儀 一首

張寶 一首

周孝壘 一首

范起鳳 二首

曹培 一首

鍾曾齡 三首

王敬之 四首

謝應芝 二首

姚清華 二首

張學鴻 二首

吳觀 二首

石嘉吉 二首

冒書嵩 一首

吳雲驤 三首

徐湘潭 六首

謝紹謀 二首

金璋 一首

陳文藻 三首

方澗 二首

及慶源 二首

呂迪 一首

朱興悌 四首

徐文心 三首

查奕慶 一首

劉侃 三首

查有榮 一首

邱光華 一首

章上弼 二首

陸應宿 四首

厲志 四首

陳權驍 三首

李忠鯁 三首

鮑臺 二首

梁松年 二首

張思齊 二首

彭泰來 七首

龔立海 一首

魯武茂 一首

張清標 四首

方陶 二首

鄒美中 一首



晚晴移詩匯卷一百二十九

徐世昌

孫超曾字傑園號石溪玉田人諸生有海岑詩集

出村

小步斜陽外平原澹夕煙東風吹短草野水上春田蒼翠  
遙林合澗洞別浦連牧童清興好弄笛柳橋邊

張善恆字他庵安邱人有菊夢廬詩鈔

秋日憶雪航二兄

不耐蕭條甚秋思苦自吟愁添千里雁夢冷十年心重以  
思兄念因之別恨深登城閒散步風雨滿霜林

拜管幼安祠

英雄爭逐鹿百金買寶刀賢者貴自守一笑甘蓬蒿所以



管幼安立志脫塵囂子魚非吾友謝絕揮金交斗祿原不  
屑況肯臣孫曹濯足滄浪水歸來白髮搔荒祠何年建再  
拜仰清高感歎不能去葉落風蕭蕭

題東村茅舍

雖設柴門晝亦關衡茅低架兩三間平分窗外千竿竹高  
卧林南一枕山釀酒每逢秋色暮鈔書常愛紙痕斑蓬蒿  
原是吾家物仲蔚年來久不刪

于社燕字受甫濰縣人有澹園詩鈔

晴沙

晴沙此遙矚煙渚翔水禽觀其自得意頗似余初心中年  
與世接觸物懷憂襟因狂遂成謗舉踵多沈吟有時吐奇  
氣蒿目對山林汗漫九垓外誰復論知音

遊道士谷

入山若入甕石棱嚙履敝劃然一壁開青松蟠腹內息足  
老子宮啜茶文公地鼓鐘謝凡響雞犬含僊意蹇裳清流  
中拋杖白雲外絕頂長嘯罷一擲塵埃事

西嶺出層霄東峯拂高鳥紆迴千徑通詰屈百靈繞石疑  
虎豹蹲樹儼龍蛇掉畏踐犖确翻慣捫松鱗老古塔未易  
登僊詩讀難了耳聾覓前呼目眩俯下杪挾勝興益濃辭  
幽心尙杳到麓瞻所歷不辨但窈窕

哭景棠墓

徂謝歸邱隴荒寒接道周故人猶在此春草不勝愁半世  
無閒日中年已白頭九重泉路邈萬事竟悠悠

安曰潤字玉如長山人諸生有信芳園吟草

醉步

醉步蓬蒿徑新詩取次成書鐙隔簾影茶鼎沸鑪聲驟雨  
隨風過殘雲逆月行蛩吟倍高興相和到天明

懷石子真明經

先生真與世情疏久掩柴門只靜居半世春心傷杜牧十  
年秋雨病相如語逢慷慨多經世詩有推敲每起予咫尺  
相違竟三載教人頻望隻輪車

李家駿字金門一字芝農河內人諸生有有真意軒詩  
存

訪薛宜堂

花氣滿闌干相逢意灑然君憑詩作業我以石爲田得句  
雲歸洞談經月在天三更人不寐鐵硯欲磨穿



題黃山谷帖

怪石靈槎筆下生  
臨淵不測霎神清  
只知詩到蘇黃盡  
染翰誰傳奕世名

祝悅霖字碧崖南匯人諸生有玉蘭山館吟草

秋晚登樓

捲簾恰喜雨初收  
村巷雲堆秔稻秋  
紫雁一聲紅葉落  
夕陽人倚竹西樓

秋江晚歸

日隱疏林暗空江  
生暮寒艣搖蘋破  
綠楓落水流丹碁  
杵聲聲急炊煙處處攢  
遙憐小兒女幾度候門看

舟中感興

綠楊裊裊水平隄  
酒醒篷窗日影西  
小倚雕欄正無賴  
隔

溪杜宇一聲嘯

殷增字曜庭號東溪震澤人有孤鴻編

詩話東溪爲譜經侍郎尊人幼工詩縣人袁樸村輯  
松陵詩徵斷自國初至乾隆間止東溪爲補輯六朝  
至明詩爲前編樸村以後詩爲後編性孝  
友悲其兄棣香早世故以孤鴻署其橐云

垂虹橋步月

雨餘天晴風亂吹雄虹飲水首下垂雷公鞭之不肯起幻  
作長橋掉其尾我來正值暮秋天江水江風欲化煙萬里  
澄空天洗出一輪高湧古嬋娟夜靜塔鈴雲外語宵深鷗  
鳥沙際眠劃然長嘯江水立清寒直偪魚龍骨手持鐵笛  
船頭坐寡鵠離鸞吹入破擁被江心夢不成可有羽衣掠  
船過

飛來峯

峯頭欲刺天石脚不著地怒同虎豹蹲聳作干將利一洞  
境一轉曲若穿珠蟻何年靈鷲峯來此作遊戲團團千苔  
薩刻石徒好事何補山川靈已鑿混沌意山靈遭俗手想  
爾亦短氣頗怪寺中僧指客誇靈異小坐冷泉亭泉聲四  
山沸卽此生道心悠然得靜契好詩忽然成飛來亦天外  
周以豐字少蓮吳縣人有散花小草

小雨

明滅初陽細不勝濛濛漸破午煙蒸灑花有色知春暝潤  
野無聲兆歲登平遠江山俱入畫深沈樓閣已宜鏡忘情  
未得吳孃曲祇恐閒愁觸又增

周嘉生字橫雲吳縣人有鉢花小草

新綠

空庭客散集鳴禽繞屋千章樹氣森影復餘花生晝靜路  
迷乳燕識春深乍過風處纔通日好放晴時又作陰不是  
卷簾人易倦天涯一望總關心

盛徵璵字小雲太倉人諸生有嘯雨草堂詩集

野步

負郭人家蠶上箔隔溪村落犢歸田滿隄楊柳滿畦菜黃  
到維摩嶺上煙

積雨書悶

一簾宿雨漏沈沈岑寂空階跣足音江渚楊花身世感池  
塘春草弟兄心縱傾濁釀愁難滌不讀離騷怨已深無賴  
游絲兩三尺半明半滅溼牆陰

不寐



支枕不成寐枯鐙一穗明風聲收草閣雪意聚江城兀  
殘年逼茫茫獨客驚如何今夕酒無計戢愁兵  
馬功儀字棣園上元人諸生有倚雲亭詩存

一例

西風吹冷客心孤青鏡鬚眉失故吾一例依人混南郭十  
年廢學悔東隅蛟龍剝蝕懷中劍湖海塵埋掌上珠千里  
江鄉歸不得空教笑士到樵夫

張寶字仙槎江甯人有仙槎游草

將之都門留別秦淮

平生心跡寄浮槎此別真成萬里賒滿篋雲煙新供養一  
囊琴劍舊生涯秦淮秋月初移棹上苑春風好看花他日  
尊前勞記憶六朝松畔是吾家

周孝堦字逋梅吳縣人有還讀廬詩鈔

蕪城

錦帆南下柳初青一瞬繁華夢易醒  
天上瓊花原有樹苑中腐草尙爲螢  
賦詩臺冷留殘月文選樓空落曉星  
此日經過何限感更誰歌吹竹西亭

范起鳳字紫庭寶山人諸生有瘦生詩鈔

晚游楞伽山

石室何年築來游日已曛野煙空際斷  
清梵靜中聞鶴去盤青嶂僧歸度白雲  
林皋疑暮雨木葉下紛紛

懷張明府履觀伊犁

天末孤臣爲涕零君恩歷盡短長亭  
此時萬里休回首落日中原數點青

曹埭字稼山吳縣人有儀鄭堂殘橐

望亭道中

真州帆集水差差愁絕編郎唱櫓遲日腳漸收雲黯處蘆  
梢作響雨來時長牌短堠程初起聽水披風酒不辭失笑  
別家纔一夜獨眠單枕有離思

鍾曾齡字杏霑號春畚寶山人諸生有紅藥山房吟橐

陶然亭

結想浮雲外翛然叩竹關車停殘葉徑亭對夕陽山蘆荻  
含秋意風霜黯佛顏老僧眼獨冷來往幾人閒  
地僻經過少煙銷竹外風雲深雙闕迴葉落四山空秋水  
涵虛白幽亭避輭紅問途人蹟遠歸鳥隔林通

夜宿龍王堂

暮色蒼然至輕煙靄四圍鶴翻空翠落龍躡晚雲歸掃葉  
烹香茗攜筐採古薇一聲清磬響不覺俗情違

王敬之字寬甫一字仲恪高郵人貢生有小言集

詩話寬甫爲石臞觀察子伯  
申尚書弟通小學尤工倚聲

早夏村居

花事碧谿盡殘寒過麥天高林數點雨深巷一聲蟬行藥  
去忘倦枕書還早眠因知靜者妙塵慮待先捐

明史閣部墓

蝦蟆天子蟋蟀相東南半壁思偏安金陵王氣復銷歇蟲  
沙四鎮餘江干史公未造此開府欲仗一木支艱難勝地  
煙花埽兵燹孤臣戰骨空摧殘公之大節足千古白日照  
耀丹心丹何必文山證前世始令曠代同悲酸鼓鼙聲歇



山邱在忠魂正氣歸衣冠衣冠不朽石碣短土花凝碧愁  
荒寒我來憑弔讀遺翰獨爲俯仰生長歎紅梅點點忽飛  
落猶疑誓師淚血臨風彈

無寐

柝聲聽無寐高館坐超忽涼秋湖上來夜氣怯病骨月斜  
人影長星河澹將沒永懷東郡遙關山不可越悵望碧天  
空臨風浩歌發

吳陵道中

一枕蟲聲夢斷餘游蹤落魄意腳踏路通海甸魚鹽賤秋  
入江關草木疏遠影樓頭鐙上後新涼篷背雨來初不嫌  
囊罄村醪薄萬事於今費破除

謝應芝字子階號浣村陽湖人貢生有會稽山齋詩

節婦吟

冷然秋風生蟋蟀鳴東廂繁霜隕木葉庭草淒以黃凌晨  
南盥櫛曳履登高堂翁姥兩年耄獨居不可長仰視浮雲  
馳孤雁凌虛翔婦心不可見昭昭白日光殷勤謝翁姥涕  
泣歸空房

唐襄文讀書樓歌

五言樓東懶雲閣飛費四起相連屬樓畔槎枒森古木阜  
筴樹大剛十圍紫藤盤繞垂溪湄梨花如雪當晝開朱闌  
拂拂清風來襄文讀書於此樓經文緯武縹緗求儒者知  
兵足韜略志意不與常人侔經義溯源在北宋勝朝取士  
神機用前有守溪後震川先生竝峙成三人半山頽濱此  
正傳思泉精詣難比肩古文亦稱大作手但恨詞氣猶傷

繁分宜當國竊權柄鈴山文序滋浮言泉石百年幾易主  
此人此樓共千古文介大書刻石存鸞飄鳳泊蛟螭舞我  
亦讀書寓此樓當空叱咤驚風雨斯文日逐江河下帷幄  
何人能禦侮先生墳墓咫尺間翁仲依稀夜深語

姚清華字蘇卿金山人有絃詩塾詩

林以善

良畫鷹

黃塵捲地風蕭瑟白日晦冥天變色翻空一鳥從天來欲  
飛不飛向虛壁金眸鐵爪銳莫當卓立風骨森開張將軍  
猿臂不得控一時狐兔皆遁藏曹霸畫馬兼畫骨此訣流  
傳幸弗失爾良畫鷹同畫馬運腕如風筆屈鐵長林月黑  
陰風號紛紛妖鳥來林皋安得此鷹一奮擊埽除六合無  
鴟梟

弄珠樓題壁

騎龍神女踏波去手弄明珠入煙霧至今萬頃琉璃中猶  
有靈光莽回互我持綠玉杖身披白蕉衫來登湖上樓湖  
水如鉤銜千年神物不可見應隨雲氣歸巉巖天風浪浪  
振屋瓦倒捲波濤向空瀉靈旗夜半偶一來醉抱冰輪斫  
龍鮓

張學鴻字潛齋常熟人諸生有濫竽齋詩集

寒夜獨酌

高垣傳漏迴斜月度窗隅無客酒難醉有書鐙不孤苦吟  
閒短枕深坐託薰鑪萬籟收寒夜銜杯且自娛

舟中望甓社湖

清淮頃刻入邗溝風便歸舟順水流城郭萬家煙樹裏一



天春色過揚州

吳觀字荆垞宜興人諸生有鷓園詩集

三渦阻風閒步湖上觀冰山

獵獵風逾健湖濱得壯觀天低鴻影大霜老荻聲乾突兀  
排山峻玲瓏映日寒輸他漁戶樂赤馬架層湍

寒山寺

瑟瑟吳江正落楓碧山古寺獨攜筇寒空鳥下巖邊塔殘  
照僧歸徑外松虛寂高齋無俗韻風狂彌勒有遺蹤扁舟  
卻趁寒潮去夢裏應聞夜半鐘

石嘉吉字藹士吳縣人有聽雨樓詩

春日郊行

水源行盡路三叉酒旆颺風樹影遮茅屋數家斜照裏土

牆缺處露梅花

玉階怨

怕見春歸去朝朝下翠幃落花如有意故傍玉階飛

冒書崑字漁舟號仁月如皋人諸生有友于軒詩草

將至汴曉行有作

雁聲驚旅夢林薄日輪紅滿橐新詩草半車黃葉風蹉跎  
人事外流蕩病情中又向夷門過蕭蕭兩鬢蓬

吳雲驤字菊翁號嶽青桐城人諸生有嶽青詩集

和姚石甫春思

柳色依然作綠陰帝城回首倍驚心音書望絕雲中雁風  
雨魂消海上琴最是五更憐夢少那堪百舌喚春深多情  
我亦如君思苦憶寒天獨擁衾

和馬元伯

好山好水能無我一詠一觴皆有緣  
自笑養閒真腹負轉思栖逸許身便  
煙霞未見耽成疾風月何曾買用錢  
曠世誰同莊子達逍遙快誦昔游篇

仲春書景

今年花信隨春早未到清明綠已肥  
九十韶光忙易過幾多觴詠賞難違  
烏犀出葉藤蘿茂紅斗含苞桃李稀  
最是詩成豪興發留賓還欲典春衣

徐湘潭字睦堂一字東松江西永豐人諸生有睦堂詩

集

詩話昔張亨甫云西江詩學至蔣心餘曾賓谷吳蘭雪而衰至徐東松而復盛推許未免過情然當舉世空談性靈獨喜爲樸淡直拙之詞如姚惜抱評黃詩有愴氣曾求闕所謂到人不愛處自守孤芳亦爲特

立之士張亨甫去廣信時雨中留別贈之詩云南州  
徐孺子清望實人師繫纜秋江闊銜杯夜雨遲斯文  
眞絕續吾道固艱危各  
勉千秋在沾襟陋散絲

夜坐

寒蟲號穹壁斜月炯虛幔幽客難早眠宵景孤賞慣未雨  
葉疑溼不風天轉淡稀星八九顆錯落當戶瞰前村白差  
差霜瓦光破亂大塊清絕氣傾洩在夜半安得伯牙生冥  
寫入絲縵

漫興

雨過田園靜春風不待招新泥黏屐齒軟草度裊腰鴨綠  
淺深水鵝黃長短條村童無一事趕蝶過溪橋

寄羽可

絕少黃金壯阮囊底須蒿目歎炎涼窮非我輩難勝任詩



到愁時轉覺強天下誰爲真富貴吾生端合老文章梅花  
不厭空齋冷肯送春光入院牆

游青原山

文坐示請坐

名藍隱深邃已近猶無覿一徑循紆迴亂峯森蔽翼鐵立  
石上松黛蔚庭前柏危簷炯金榜猶是宋題額覺王殿宇  
雄莊嚴盛功德緣階鴿不怖聞鐘魚就食天香從西來鼻  
受心有得旁廊轉深曲龍蛇走石壁顏魯山黃山谷及李相忠定

公忠義標心畫嗚呼百世下珍重摹手澤徘徊此循賞不

覺日西昃方丈借一氈凝神安偃息半偈參沈沈一燈明  
的的夜來春雨寒夢破前山碧凌晨出西閣祖塔禮幽宅  
傳聞牛鬼雄賴此鎮狂魄碧乳泉更奇頓足通水脈何人  
安地軸一激高數尺地靈昭異境茲理究莫測東岡五笑

亭臨淵踞盤石髣髴三峽橋怒流奔霹靂戰兢戒徒侶無  
使蛟龍獲茲山在吾郡叢林推巨擘夜來講學輩于此混  
儒釋兩家互有人各各樹壇席可憐同盛衰風流今寥闕  
倒荆花久枯五賢祠已圻我來縱游眺淹留祇一夕探勝  
興雖濃懷古情尤劇不識千載後知否復此客

山居

茅廬七八自成村草蔓蟠窗山擁門地僻久無賓過擾晝  
長閒與鶴通言西風晚日翻鷗鼻野水秋田長稻孫但得  
優游遂小隱底須辛苦覓桃源

石溪客館夜坐示諸生

金溪距石溪少慳十里途養疴就鄰黨聊復兼授徒童冠  
森立竹朝夕恆相於豈不念家室旬月便通書半生遠游

倦息肩中道舒時有糗糒入兼爲文字娛夜深月影高風  
厲燈花麤諸生悉英茂努力勤經畚我醉一揮翰詩律將  
毋疏

謝紹謀字大逸福建歸化人諸生有小峩嶠山人詩集  
相逢行

今日亦相逢明日亦相逢華堂置酒生春風今日亦相逢  
明日不相識翟公門巷無顏色

鐵柱觀

羽節風飄白玉臺半空聞樂奏蓬萊鳳階三級雞猶語龍  
帳千年鼠尙猜曉月焚香人鬼雜紅塵濟物佛仙該旌陽  
吏隱何曾傲說與攢眉入社才

金璋字左峩永嘉人有翠微山房詩橐

石塘

人煙不知處深曲數峯橫路截溪流入雲從館壁生村醪  
浮月色客枕納松聲計日鄉關近山行第一程

陳文藻字愚泉平湖人  
有鏡池樓吟橐

詩話愚泉詩得同里朱雅山指授清新刻露有青松  
白石之致古詩饒有氣骨律體亦平正少業櫛繼以  
養母弱冠始爲詩世以  
比蕭木匠釋柯集云

秋夜同林雪巖小飲

雨霽疏林暮色昏草堂幽興託清尊夜涼小徑風生竹人  
靜孤村月到門冷砌蛩聲和遠漏虛窗鐙影淡秋痕貧交  
卻喜無他事不限吟情對榻論

梅花

昨夜寒香破凍魂一枝牆角倚黃昏夢回孤館塵無跡春



到空山月有痕煙外板橋殘雪岸水邊茅屋夕陽村可憐  
冷落西泠路猶是亭亭立墓門

宿山寺

古寺荒涼對夕曛寥寥禪境絕埃氛斷巖石氣侵衣冷曲  
澗泉流過竹分林靜鶴棲雙樹月山高僧卧一樓雲到來  
便覺塵機息風磬泠泠入夜聞

方洞字從伊號星厓秀水人有卜硯齋集

題畫扇贈戴松門

十幅春帆天際飛籬笆短短隔漁磯山藏遠樹雲藏屋村  
犬無聲客到稀

下北高峯

欲雨不雨天有影無影樹白雲從空來遮斷出山路

及慶源字積堂錢塘人諸生有小栗山房集

元夕寄戴比部金溪先生

敦元

郎官芋食最宜男元夜他鄉舊俗諳大有吉祥欣卜繭尙  
餘風味互傳柑一天春氣銀蟾麗百道鎗光火鳳含忽憶  
去年今日事歸帆初卸酒初酣

龍游雨泊

攤飯小眠起茫茫漲拍天煙江三日雨雲壑萬重泉山勢  
谿流曲灘聲水碓連龍游城外路沽酌又停船

呂迪字長吉餘姚人諸生有屐山山房詩藁

秋懷

懶卧元龍百尺樓如聞宋玉慣悲秋西風白草蜻蛚老暮  
雨黃花蛺蝶愁難爲鶴謀田二頃且將奴賣橘千頭破除

萬事無奇策試向糟邱覓醉侯

亦未及文

朱興悌字子愷號西厓浦江人貢生有西厓詩鈔

讀傅筱巖纂沈耕巖先生隱迹錄

復社名流誰與班閒披隱迹白雲間浮家遠泛雙溪水曳  
屨晴游三洞山梅福吳門名已晦趙岐北海老方還寓賢  
爲立徵君傳鸞鶴高風不可攀

游石陵謁倪文卿先生墓

草莽書生依宋土北望中原思藝祖宮車淚灑牟駝岡雪  
恥不忘縛金虜袖中擬上中興書滿壁張圖森部伍布衣  
老不挂朝纓慷慨大聲咤廣武天涯淪落莽蕭蕭誰其知  
者陳同甫石陵原上高士墳佇立蒼茫爲懷古風流消歇  
七百年萬樹秋聲嘯杜宇

餘姚懷黃梨洲先生

扁舟浮海後故國感沈淪鉤黨收名士辭榮列逸民風高  
黃竹浦交盡白衣人石室鴻文富停橈一問津

次笠東屏迹疊韻

寄迹牆東成屏迹冬烘兀自著書閒寒來背炙三竿日興  
到神游五岳山埽徑頻因紅葉墜開窗不礙白雲還吾廬  
吾愛多佳趣一種幽情未可刪

徐文心字良庵烏程人諸生有甲六集

草田畦

山寒水且落舟行趣不稀浦樹數行斷野田浴鷺飛艤舟  
當斜日植梨帶戶扉田父笑相就濁醪罄依依雞鳴野煙  
白犬吠南鄰歸惆悵飄蓬客餘布未成衣



過茅氏莊

一棹隨斷冰數家隱溪口雞犬聚羣游場圃登前後夕陽  
下桑榆寒花被古阜歲宴會有終壯心空復負感此念蓬  
蒿聊爾傾斗酒

貧女怨

不羨明珠佩偏來一片愁可憐閨裏月圓缺幾春秋命豈  
荆釵薄容窺玉鏡羞寒衣空自擣相憶浣溪頭

查奕慶字葑湖海甯人諸生

山行

高眠白石愛松聲小犬頻來掉尾迎山缺恰看茅屋補雲  
歸忽斷柳橋晴迷途好記臨溪樹冒險重題峭壁名偶共  
老翁談往昔爲言桑海幾回更

劉侃字諫史號香雪江山人有香雪詩存

明湖道上

曉鐘散前林山人秋睡足短筇破湖煙一徑入寒綠行行到深灣驚起兩飛鷁

秋眺西山絕頂

開樽飛鳥外倚杖暮鐘時天截餘霞斷人梯石磴危遠村連野闊小谷得秋遲不覺歸來暮家家正晚炊

桐江舟中

灘到桐廬盡江流自此平遠煙團小屋斜照起秋聲浪細千鱗見風和一棹輕計程餘兩驛遙盼虎林城

查有榮字蘭舫海甯人諸生

詩話查氏海昌大族初白庵主以詩名其家餘風遠被嘉慶中藹亭參軍人和與潘吾亭倡爲聲字韻詩

羣從及諸子弟世官南廬一飛也白有新春園揆梅  
史奕慶葑湖逸放農恂稻生人洪清華有榮蘭舫有  
炳琴舫從而和之吳山尊郭頻伽馮柳東輩亦依  
韻往復次爲今雨聯吟集張荔園爲序而刻之

晚泊剡溪有感

微陰釀雨獨無聲繫纜沙汀野老迎芳草綠拖春水影布  
帆紅帶夕陽晴難拋煙景偏荒學直爲窮愁易損名底是  
青溪來訪戴山陰舊夢幾曾更

邱光華字旦齋嘉興人諸生有三畝草堂詩鈔

朱竹垞太史著書硯歌爲曹種水言純賦

太史跋扈翰墨場罷官長揖歸故鄉北垞之南南垞北有  
亭萬卷羅縹緗著書等身老彌篤如起廢疾鍼膏肓經兼  
鄭孔史班馬此硯晨夕時相將憶昔太史返大庾一百八  
石載歸航硃砂斑紅雀斑黑鸚鵡眼碧鴉眼黃已聞榜人

明眼余言匯卷一百二十一  
六  
竊其九餘亦散盡無留藏復從何處得端產軒然一笑誰  
能詳曹君博物清門彥頻年鼓棹游維揚傾囊購得太史  
硯巧偷豪奪嗤襄陽近來好事工作僞片瓦輒欲誇香姜  
卽如樊榭跋此硯謂曾過眼見數方晴窗展玩三歎息魯  
鼎真贗空評量物因人重僞亦好況喜石質尤精良流傳  
儻人俗人手何異黠鼠銜生薑誰知精靈默呵護前歸樊  
榭後古香從茲定見虹貫月滄江夜夜生光芒

章上弼字竹隱嘉興人諸生有鶴舫詩鈔

嘯飢行

一旱逾兩年一水又三月雨暘旣失時災荒遂迭出自從  
入秋來良田再淪沒隄防豈不嚴所苦人力竭秋場禾不  
登日漸生計拙比鄰八九家薄暮炊煙絕側耳聞嘯飢傷



心難具述因思良有司救荒豈無術救荒救已荒所操術  
已末要在裕其原勿使有所缺因事課情勤盡心及溝洫  
催科鞭撲寬民得食其力先事不綢繆後悔徒操切瑣瑣  
鄉里間貧富相贍恤蓋藏亦無多人眾不易活誰指干石  
困聊爾濟倉卒慨此念哀鴻浩歌腸內熱天心本仁愛願  
民足衣食胡爲降鞠凶蕩及萬家室粟貴性命賤攘奪恐  
騷屑履霜思堅冰憂懷何時輟

葛嶺

蟾蜍靜吸初陽日蟋蟀秋鳴半壁天一種江山兩遭際忽  
然富貴忽神仙

陸應宿字崑圃號筱雲錢塘人諸生有筱雲詩集

詩話筱雲爲袁簡齋彌甥少孤依其太母於隨園親承簡齋指授簡齋暮年名重求文字者無虛日頗屬



庖代因是詩  
筆絕類倉山

到隨園

此身如夢到鄉娘  
紙醉金迷獨倚欄  
六代山從高閣見  
四時花向小春看  
漫誇福地棲身好  
轉恐奇書盡讀難  
爲語絳紗諸弟子  
魯公門下有韋丹

韋丹以甥孫從顏真卿學

雨中晚步

芳塘引步晚來天  
柳色深沈暮色連  
微雨小橋人獨立  
鷺鷥飛破一溪煙

綠珠

金谷樓前玉質摧  
烏鵲月落有餘哀  
美人一點分明意  
不是珍珠買得來

七月三日夜坐

玉宇微微襯薄雲  
銀河何處問仙津  
卻憐新月如新婦  
才露蛾眉便避人

厲志字心甫一字駭谷定海人諸生有白華山人詩鈔

詩話駭谷工書尤精行草善畫山水蘭竹詩純學太白清微細靜不爲貌襲嘗作詩說云學古詩最要有力有力則堅堅則光焰逼人作詩務在足意意不足詩可不作又言今人作詩氣在前以意尾之古人作詩意在前に氣運之論列唐以後詩人於宋推梅直講於國初推施愚山與全謝山相合

登疊石嶺望霽雪

危徑盤盤緣細縷  
行步圯側屢跛蹶  
絕頂望見天際峯  
一排張如析翟鏤  
冰錯鏗森萬象高  
接彤雲暗空白槎  
枒老樹雜野梅  
忍凍作花少顏色  
巖流挂玉何紛垂  
互與枯藤縛危石  
狐兔不出飛鳥盡  
茫茫大地無人迹  
山中應有素書在  
安得相逢羽衣客

晚步

芳草已倦綠老樹猶酣青閒逕糝細花晚氣扶幽馨羣鳴  
羨禽眾孤賞淒客零方園不盈畝一日且百經認茲雙履  
跡朝來杳以冥鄰沾足吾醉清風吹牖楹

三月二十日同阮林登江心寺塔置酒作歌贈阮林  
江心一塔何崔嵬七層湧地波滌洞低飛鳥雀俯叢樹高  
空雲日手可麾岡巒四面競神秀城邑千家環迤透夾岸  
村落置芳甸薺菜花發堆黃埃東來春色鬱靡盡網緼大  
塊爲生涯請君對此開懷抱酌君美酒傾金罍宇宙茫茫  
一鑪冶窮達修短何有哉當前景物良可惜豈必人事論  
興衰江頭潮生復潮落須臾變滅迅莫追浩歌向天天不  
聞吹墮空使行人哀

謝池月夜

雨霽雲色淨天曠月華清老樹列池岸修闌無人憑坐拂  
苔閒石移時微風生初蟲潤餘瀆暗抱巖草鳴陰律行未  
調細澀無齊聲感我千載念穆然來中情勝賞昔所企高  
懷今與併闌寂了心悟茫然塵世輕

陳權翼字占甫鄞縣人諸生有簫樓詩橐

秋雨

西風急天漢挾雨到簾櫳詩意滿梧葉秋聲老草蟲有人  
傷酒醒無計破愁工攬起紗幬碧呼僮護桂叢

西冷感舊

幾日秋風到柳枝可憐瘦盡綠絲絲我來獨立西湖晚只  
有青山是舊時



謝疊山遺琴詩爲新安吳素江明經

景潮賦

運窮江左天源涸六陵風雨日蕭索玉雁珠鳧飛滿天孤  
琴破土久無著燕中流落轉吳中無人寶此三尺桐吳君  
雅有古琴癖摩挲拂拭生英風抹眇檐前細審視署名隱  
見疊山氏銘辭十六自成文東山之桐西山梓快哉神物  
欣收藏題詩徵事徒茫茫清風亮節照白日何勞禿管重  
低昂不如高置百壺酒招邀壯士一濡首酒酣耳熱劍欲  
鳴便取遺琴試揮手一彈再鼓悲風生駢馳雜糅神魂驚  
匡山怒濤忽千尺何人慟哭西臺聲悽悽切切欲愁絕絕  
似蘭亭水嗚咽朱鳥歸來陵谷變萬里游魂肝膽裂浮雲  
柳絮隨飛揚徘徊顧慕哀以長彷彿建陽東嚮日憫忠寺  
裏夜徬徨請君推手勿終曲座上有人淚盈掬煙沈月落



冬青寒杜鵑  
嗚斷春山綠  
玉帶生竹如意  
靈物由來不終  
闕松間石上遇  
知音從此長留  
在天地

李忠鯁字懶仙  
鄞縣人有八軀  
吟館詩存

秋郊暮望

蕭蕭黃葉落  
漁篷小立官橋  
悵晚風隄蓼亦  
知秋寂寞一枝  
留向水邊紅

雨夜有懷

三徑雲俱黑  
高齋燈自青  
江湖牽遠夢  
風雨到空庭  
如此淒清夜  
何堪闊別經  
孤眠不成寐  
望斷子雲亭

秋草

幾日蘼蕪徑  
盡荒蕭條畫  
出野人莊綠  
波空想江南  
影青冢先迎  
塞上涼千里  
相思愁細雨  
六朝遺恨付  
斜陽籬邊

水曲都如此何況西風木葉狂

鮑臺字朝金號石芝平陽人貢生有一粟軒詩集

留別朱愚谷

陰壑生微煙陽崖明霽雪撫景感蕭森況與故人別君材  
如喬松磔柯多奇節振翰散連珠粲花矜慧舌示我琳瑯  
篇碧海紫鯨掣良晤復幾時祖席悲金玦翹首眺飛鴻高  
雲謝羈紲

湛湛零露繁撼撼朔風慄主人惜分攜華餞中宵設玉管  
聲參差蘭肴恣鋪啜坐久夜已闌寒鐙半明滅出戶霜天  
高星斗燦以列方暉透綺窗明明如可掇對此發歡顏聊  
復紆鬱結

反轡期詰朝騷歌何激烈悠悠陌路間與誰論金鐵浮雲

西忽東圓景盈復缺知君惆儻人飲冰忘內熱玉樹有芳  
陰瑤琴無促節願言加餐飯努力師前哲

梁松年字夢軒番禺人諸生有心遠小榭詩集

初秋雜詠

有感夜孤坐相思斷復連獨彈幽怨調誰拂別離絃鶴警  
月中露螢飛雨後天砧聲如識意莫到戍樓邊

杏花雨

臙脂淡冷罩冰綃宋玉牆東絳雪飄一夜小樓聽不盡幾  
村新漲泛紅潮

張思齊字賢仲號無山順德人優貢有吟秋館詩鈔

峽江

一水穿雙峽孤城隱亂山暮天聞水碓斜日掩柴關地憶

巴邱舊溪如碧玉環欲尋梅福宅應在白雲間

秦郵道中

三十六陂水孤城一覆盂柳陰沿岸密山色過江無井鍊  
仙人藥波浮明月珠樊梁溪景好畫本借倪迂

彭泰來字子大高要人有詩義堂後集

光孝寺新建虞仲翔祠爲曾賓谷方伯賦

菩提身高煙雨碧訶子林空訪遺宅說偈猶傳五葉禪談  
經誰夢三爻易文章方伯曾南城祠堂肇祀虞先生海外

韓蘇能愛士眼前屈賈有深情

方伯謨碑  
比以屈賈

天發神讖碑久

傾千五百載新宮銘于禁昔歸虛座設孔融未死瘴鄉行  
盜跖餘財豈足道可惜吳儂厭家寶遼海空思周舍言會  
稽不許蕭何老嗚呼論世足感慨嗶啞沓同時幾傾倒弔客



從今祠下多心交自古生前少古今何代無賢才南州桂  
樹初誰栽憑將薦荔傳芭意一洗江魚野鵬哀

滕王閣晚泊

西山一片雨暮色大江前帝子仍高閣他鄉又禁煙家書  
通粵使春水泛吳船往日登臨客關山最少年

湖上望廬山醉歌

挂席鄱陽船痛飲潯陽酒二千里外不逢人五老雲中忽  
招手湖波一白吞長空波心倒濯青芙蓉石梁三道揭南  
斗雲錦九疊張天風天風雲開宛虹不來洪荒昔濛滔天  
可哀高厓絕壁不知幾萬仞禹航所汎下壓千崔嵬螭書  
籠畫入石處亙古靈蹤翳神露紫霄直上連青冥咫尺飛  
翔玉京路湖上南溟客醉賦廬山篇匡君兄弟笑相視問



我浮世今何年眼中陶謝兩黃鵠滅景遠入香鑪煙吟詩  
吾憐孟浩然草堂亦愛白樂天儻與盧敖汗漫遊戲太清  
上安知我身前度非青蓮浩歌叩舷風日美山雪春融九  
江水江南江北青山多有酒不飲如山何

督亢行

黃雲屯空如萬馬督亢坡前馬不下斷虹掉尾入古城城  
頭浩浩烏鴉聲昌國君亡郭隗死鶉首賜秦天醉矣刺秦  
不刺燕必亡萬死一中當靈長鐵椎鉛筑亦此策只未先  
將瀉池璧不識荆卿一片心當日躊躇待何客蕭蕭易水  
光如刀秋風刮地吹征袍棧車輾輾天馬勞黃金臺古生  
蓬蒿

過陳仲卿

曇

明經

通天上表沈初明懷刺生毛禰正平萬里客游何所遇五  
年回首若爲情幽燕氣老新詩在湖海才多百感生獨愧  
飄零東閣士齒牙猶有漢公卿

君言南昌見賓谷先生問余近況

### 殘雨

殘雨如人語無聲復有聲爲誰寫幽怨竟夕不分明地僻  
秋心早夢寒江水生江波一雙鯉應到越王城

昨寄雪漁省邸書

訶林小住賓谷先生畫像刻石適成感賦

拂簷訶子落秋陰重向方池照古心青歲回頭人影月

皆癸

事黃塵彈指去來今虞祠片石寒山在樂令遺踪畫省深

昨日西湖街上過推敲畏續浪仙吟

今方伯熊公常錚卽先生女夫當時同爲

行省坐客

龔立海字柱君號雲濤巴陵人諸生有垂雲山房詩集

重赴宜章

十載高臺傍定王，秋空一雁又南翔。  
慚無楚典芟雞次，喜有神風借馬當。  
久別山疑逢舊友，慣游人似未離鄉。  
不知都尉當年柳，故墨蕭蕭賸幾行。

先都尉公曾守宜章

魯武茂字蒼崖，長沙人。諸生有所園詩存。

臨虛亭感作

一笠空亭我獨登，關山四望繞層層。  
浮雲蔽日迷三楚，黃葉吟風下二陵。  
心事不堪嗤狡兔，世情只可問青蠅。  
平蕪毛血都凡鳥，擬化臨虛側目鷹。

張清標字令上，號竹樵，漢川人。諸生有竹樵詩集。

題杜茶村鐙船歌後

煞尾聲傳感逝波，南朝往事已銷磨。  
蒼涼一掬興衰淚，迸

入漸漸麥秀歌一百二十此錄

何處聞歌不可憐秦淮絲竹委荒煙傷心寄語阮司馬慚愧春鐙燕子箋

漢川西赤壁街爲五赤壁之一余數過之見垂楊數十株搖曳西風落照間爲賦二絕句

街南街北幾停車無數垂楊縮幕鴉惟有夕陽消不盡又隨秋水蘆花

搖落新河欲上潮西風吹浪打山椒憑誰問取孫曹事間聽漁歌出葦蕭

方陶字柳村漢川人諸生有醉菊亭詩鈔

月

片月如良友相看不忍眠況逢孤館夜又是乍晴天峯迴



明殘照霜清淨野煙何人吹玉笛聲落畫欄前

渡人菴遲友不至

楓葉平林滿蘆花淺渚飛秋風生浦口落日在巖扉坐待  
幽人語甯知夙約違徘徊明月出獨送棹歌歸

鄒美中字華亭公安人諸生有燕石藏橐

晚發御路口

劃出滄江路歸舟落照邊天空秋在水客久日爲年薄暮  
催帆急中流得月先誰歟羨魚者獨自釣寒煙

晚晴蓀詩匯卷一百二十九終



晚晴篋詩匯卷一百三十目錄

宗稷辰 二十二首  
梅曾亮 二十一首

瑞元 一首  
楊豫成 二首

陳偕燦 六首  
許乃穀 三首

施彥士 一首  
劉鴻庚 二首

蘇宗經 一首  
劉廣智 一首

張海珊 九首  
梁紹壬 二首

鮑作雨 四首  
何殿春 二首

翁心存 八首  
李棠階 五首

羅文俊 三首  
吉年 一首

沈丹槐 一首  
趙似祖 三首

吉珩 二首  
張維屏 八首

姚柬之 十一首

鄒堯廷 二一首

蓋鉦 一首

何熙績 三一首

翟云升 二一首

李棠習 五一首

梁際王 二一首

梁際王 二一首

梁際王 二一首

梁際王 二一首

梁際王 二一首

梁際王 二一首

梁際王 二一首

梁際王 二一首

梁際王 二一首

晚晴簃詩匯卷一百三十

徐世昌

宗稷辰字滌甫會稽人道光辛巳舉人歷官山東運河

道有躬恥齋集

詩話滌甫早歲研精理學復留心經世之書所著論  
說自深慮至俟命凡十八篇生平蘊蓄略具為御史  
遇事敢言嘗上平寇需才疏臚列人才以左文襄首  
薦於任城修方正學祠重刊遜志齋遺書於京師建  
正氣閣以祀國殤在里創立四賢講社李越縵王于  
邁皆招致著錄越縵贈于邁詩云東林宗炳開講堂  
繪衣賦蛤坐滿廊跼聽講不奪席出門仰面凌秋  
光人生刺促不稱意誰謂少年足游戲各歸閉戶研  
千秋莫逐雞蟲作生計蓋有微辭焉其詩力追正始  
胸有古人非苟為炳煇者自序少作謂方望溪先生  
有言詩小道也古人弗重然則士大夫所重有主乎  
詩之中者而詩可名詩亦不可不名也蒙之於詩不  
克審格律求工鍊意之所欲言抒之於筆意盡則止  
誠不敢令真詩人見亦不可令偽詩人見也  
其所嚮  
所在矣

晚晴簃詩匯卷一百三十

樟樹鎮

誓師仗節見名儒鹿渚於今緬壯圖客路雙歧爭楚粵上  
流一柱扼江湖雄風力挽狂瀾迅落日光搖大樹孤可幸  
承平長偃武舊時銘碣委煙蕪

舟行晚望

晚風徐趁布颿斜細作之而浪感花雨後天光橫抹黛海  
中日影倒成霞防江埃戍鐙先起近浦漁莊樹半遮行到  
菰蘆深處泊朦朧淡月照平沙

抵金陵

鍾山雲氣鬱蒼蒼兩岸菰蘆送雨涼天限長江雄鎖鑰城  
連廣野壯金湯鳳凰飛去遺音遠燕子歸來舊恨長寂寞  
水西門外路哀蟬淒絕老垂楊



貴溪

山胡靈曰龍虎道陵之地三十二鬼谷之天第十五大塊  
何心任汝名奇稱更翔天師府蒼蒼者天果有師真視造  
化如小兒傳家四十有餘代師不易姓誰知之吾索其說  
久而得信州山川多怪崛中鬱靈氣聚鬼神子房兒孫逞  
祕術循名責實古職巫史祝之屬禮不無赤松黃石本家  
學天念乃祖容其徒不然張氏有何德而敢踵襲欺天乎  
異鳥來紀臨安錢王疑塚也

異鳥來知縣堂券磚出書錢王錢王疑塚非一方治東

咸淳

志城北萬曆兩志如騎牆史臣書葬稽後唐曰在茅山之

原錦衣鄉大都假託歸荒茫想王慮遠謀孔臧卜於邑治  
無盜戕確有徵信碑則詳李元臨安之功不可忘君不見

六陵乃遭髡逆楊名阡巨墓多羅殃惟王澤在吳越疆愛  
人及樹誰忍傷非徒恃此爲善藏不然曹公七十二胡以  
漳河敗露由飛鉞

揚州懷古

清游自昔豔江都前哲風流近有無上國文章重枚董才  
人筦領仗歐蘇玉鉤月冷衰朝鑑金帶花明盛世圖廿四  
垂虹湖卅六不堪極目送煙蕪

春逗珠陂凍已消青山殘雪氣清寥八仙種子還稱李萬  
卷樓居舊姓蕭梅嶺衣冠藏碧血草堂絃管泣冰綃賣花  
沽酒東原老吾愛吾宗見地超

冶歌人去百年秋老樹依依動暮愁柳七魂從殘月弔春  
三節愛畫橋游雞臺風雅淮南盡蠶尾詩篇海內收寶帶

河灣重迴首玉簫嗚咽舊江樓

竹林桂苑盛談經箋詁蟲魚汗簡青  
注選餘風宜析洽導江一脈總零丁  
藝林尙識睢陽氣鹽俗曾居處土星  
煙月誤人揚子渡滄浪清嘯共誰聽

途中書見

湖莊多放鴨拍拍煙波裏薄暮一竿  
招歸來抱鳧子水國無薪木廚寒嬾  
子飢可憐大隄上偷拾敗蘆歸

光武廟和柳如珪韻

春陵一脈久棲遲赤手能舉大將旗  
紫色空摹周禮樣蒼生深切漢家思  
驅除王業才同創保愛功臣賞不私  
千古中興推第一宋高唐肅已無祠

入辰州界端險層出怪石窮極百態  
縹纜所引人如

晚晴雜言圖卷一百三十一  
三  
暖揉山徑危仄處善士鎔鐵繩繫峭壁得攀緣焉

舟中無俚因書所見時甲申重五日也

志云鐵繩  
遲副使所

捐

袞延蓄氣地轉陡鼎州之尾五溪首奇峯嵯嵯矗星斗磅  
礴盤旋忽左右非土非石凝結千載久風沙搏出造化手  
因勢而成自岡阜蠢然巨石天半來硯硯礫礫一似羣羊  
被叱下水走鬼神驅之鍵坤紐人力于茲復何有想自漢  
家有事西南夷鳥道窮搜入蠻藪三苗不待神禹殺六詔  
遂憂李唐蹂伏波靈鼓不絕聲鷓鴣敢嘒獸敢風此徑一  
闢傾洞開飛廬直上競抖擻百丈牽從石罅出驚湍潑船  
急篙培纜夫偃僂類蠖負繭趾裸膚面深黝絕頂蛇行狀  
蚴蟉巉巖怪石何所緣幸藉鐵繩貫且朽日數十里卯至



西舟人孔勞况忍糾我思天地愛中原四裔在邊設險守  
山川屹屹爲金湯木石森森列干橛大利足恃大害伏要  
使幽遐絕氛垢方今巖疆息兵化已厚黍谷何憂更生莠  
書生之眼識培塿蓬窗顧盼尤奮缶扼隘探原此焉取聊  
供談天之舌懸河口忽聞大聲轟耳後狂吟好續鯨鯢吼

辰龍關

南去羣山簇劍鋸天開絕壁壯蠻荒關門曉啟風聲陡戍  
埃煙消月色涼萬里巴黔聯臂指一時苗犵盡農桑猶聞  
介子威名在到此心雄廣武場

謂羹堂  
傅公

鬢嶺

亂山如髮何鬢鬢一盤一轉雲層層綠螺挽出見天巧巖  
妝靚黛爭誇矜芙蓉高聳連天碧風鬟霧鬢煙長溼人如

蝴蝶髻邊飛絕頂梅花豔於雪上有花枝簪帶香下臨清  
溪明鏡光東方初曙早晞髮皎如翠鳳鳴朝陽嶺頭登躋  
髻頭住在雲中跨雲去三十餘里菱湖開回首花鬢滉  
仙露

汴京懷古

莽莽中原戒大河氣爭龍虎古今多宣防終少金隄策繁  
豔猶聞雪苑歌蓬澤煙波飛野鷺良山花石付明駝名王  
代謝聲華盡祇有夷門竟不磨

溪山紀游詩

丁亥六月二十二日曉偕蕭齋出太平門喚小船渡瀟入愚溪邀趙南宮茂才

茂才攜茗果以從溯流至鉞鉞潭登岸北行逾嶺至芝山憩僧舍啜茗果摩挲寺後巖壁間古刻問所謂芝巖尚在山側無大路攀藤荔循峭石而下路漸平易至巖初入門高而不宏入數十步即幽黑而石寔低焚草炬燭之內深黝不知所極石乳凝結有如人立者旁有竅煙達於外巖外巖上有

天然石梁梁後洞見巖底陡滑不能下惜少泉瀑  
幸有大聞洞溪水出田間壩上涓涓作聲以助之  
巖中產靈藥仙茅橋柚桐竹不勝計下皆良田歸  
則從平隴焉隴上望山石皆疊砌如城堞狀柳氏  
所謂石城殆此類也過小板橋而西日陶家沖又  
過石橋而東至柳巖巖舊在山巔後爲人塞其竇  
不可得入自宋以來始在中野有宋王淮伯清記  
字尙可讀恨爲村俚削鑿形象索然大可愴歎出  
巖南行至普濟庵小憩及水涯與趙茂才別度浮  
橋而還時日已正午矣偃卧蕭齋竹榻醒而記此

居永十三年溪山如我鄉足所未曾到芝柳遙相望勝游

久思補每爲俗慮妨昨聞蕭子約入耳神已翔策勇無逡

巡豈畏火繖張登山先涉淵溯澗招一航舟沿染溪涿夾

岸花草香屢折逾清幽興懷梅壑長愚溪以上七古潭指

鈷鉞元址未暇詳魚砭悵阻舟我友示周行王孫老愚溪

山環井里旁導我先芝巖直上千仞岡荒寺負石壁其下

殊清涼茗果頓解渴幸得我友將石皆具巖形訝谿嘯且

強眾竅不盡闕通塞分明盲求巖轉不得履隋心彷徨遲  
久始見之石戶蘿葛荒攀援入幽谷身繞龍螭腸漸入光  
漸黝然炬照昏黃家僮學蛇行深探喜欲狂黑地見人立  
凝鑄白石漿膚寸縫偶裂一綫偷天光外巖更陡絕洞口  
橫石梁可望不可下坐嘯凌空蒼歸路徑平疇小橋通陂  
塘中田突巖石柳侯曾相羊地僻人跡稀雲根任縱戕伯  
清記猶存餘刻多迷茫撝呵責鬼物斧刃驅蝟蟾愛人及  
遺迹忍不加禁防行行屢回顧懷古增慨慷連舟度帶水  
無勞褰子裳歸來千秋館午晷當驕陽卧游續前勝清夢  
飛篷艤袖中滿煙雲腳底思雷碾好景不能說但覺氣激  
昂

偕青園登繁塔

卽繁臺卽周顯德初建宋重修明初削去三層以壓勝



斷塔荒涼王氣空檐鈴不語靜天風巢危鶴去青雲表水  
徙龍歸大壑東梵簡舊曾繙善業塔壁宋刻十善業經略苔紋近已  
繡空桐低徊無限滄桑事盡在蒼茫一望中

題王叔和憲中所藏磬石本蘭亭敘楊升庵跋云房元齡等摹臨蘭

亭鑄玉版九石版三此為濠州磬石亦稱靈壁者也色如墨叩之琅然晤旁微缺會字磨滅羣右帶流字有損背有右軍像成化中賈人得之日本案此帖雖小異玉枕縮體略相似鉤刻俱不工恐是升庵所為姑微風之以俟真鑒

升庵嗜古多創奇响嘍石鼓紛陸離此本來從日所出想  
自通倭初得之浮沈海外無人識落寞千年誰拾得成嘉  
相去亦有年氈蠟不傷惟角折迨今閱世更長久寶物自  
當不脛走真賞偏逢節相遲張制府百齡得此石藏之江甯節署搗呵定有  
靈祇守頗類遺經估舶傳鑒家過眼認雲煙人間晚出宜

珍異玉磬聲高玉枕前

題商彝圖爲王蓉洲

憲成

在昔有殷秉金氣吉金創制尊彝良徵文蟲苦宋不足學  
醜閒發千秋藏父辛化鬲見阮筆詔異禮叔紛難詳子氏  
四辛薄蓋曰小衰憑謂小辛憑謂小辛宜弗彰唯王曰旦紀辛幹

立十四禩邁成湯辛丁之間介沃甲初及復世承宗祊尊  
爲父辛善紹述耿庇再造時平康凌都新出自寶器物聚  
所好歸王郎王郎耆古辨奇篆五字鑄腹殊補鐳鬲非款  
足義假格禾爲穌省册用亨想其奉將入考廟絜酌耐醴  
升椒香無煩析木狀負荷不事立戈旌勇彊致與宥與出  
誰手酉壺辛爵同其相它器父辛上又有干支字皆紀造器之時土中剝蝕幾  
元會遇子特顯精鏐光金焦媵鼎有故事虞山合度羣真

觴可以俯挹東海水或更仰斟北斗漿投醪潤澤徧天下  
堯樽舜甕波汪洋白雲垂霄虹繞屋永爲盛世儲珍祥

永祿六年永州衛屯丁保狀歌昔館鎮廡於營  
檣廢紙中得之

西南殘局支龍虎李定國力  
爭龍虎關天香吹墜安隆所時在民餐

竹實年征徭難緩屯田戶狀云保到左五所  
屯甲及戶丁某某賸贖飄零紀

僭朝瀟江烏合尙喧囂晉王空慕沙陀節一入滇池燄盡

消

題金冬心徵君農臨東漢華山廟碑爲武筠莊壽齡

所藏黃小松舊藏本小松得之沛甯筠莊之婦翁  
李石屏亦得之沛甯今歸筠

莊則在  
東平也

金天豁西爽浩浩鬱空翠文肖清明姿實聿炎漢世郭香

察蔡書延熹八年事是名華岳碑海內本存二一全者宋漫

堂缺者王無異

宏撰

冬心爲合樨神物乃一致未徵玉虹刻

欣見稽留字想其運筆飛揮灑出靈氣突如蛟龍躍赫若  
風雨至離披裊藤蘿橫掃逞鋒勢黑疑偃松狀自得聖帚  
意近楷竝近草更忘作分隸雙鉤旣遠勝重鐫翻不逮半  
璧落秋奩殘芬賸巾笥誰謂金司農乃逢李都尉帖同傳  
硯重珍比藏經遺到眼足稱福饜心乍知味書此豹斑餘  
聊以當題識

梅曾亮字伯言上元人道光壬午進士歷官戶部郎中

有柏規山房集

詩話伯言初爲駢體文旣聞姚惜抱古文之學始專  
力於古文辭論者至以姚梅並稱詩不逮其文然質  
直渾樸得詩教敦厚之  
指此境亦未易幾也

贈左匡叔歸桐城



方君植之能說子古貌雄情無與比偶然折券散千金三  
冬無褐心不恥矇矓世事若無意要最千年看如咫五勝  
新推十六家一日曾行三百里竭來爲客至江南憔悴儒  
冠尙如此馬生與君意氣親得錢沽酒爲佳賓酒酣歎息  
新知樂客子逢人喜任真當途之子多羞貧熟視自循頭  
上巾不如南畝還收身青鞋布鞵誰能馴方君方君亦偏  
灰千言不如十斛麥等是東西南北人送爾江頭獨歸客

贈鈕非石

散盡黃金鬢改元獨餘翰墨得留連時追苦縣光和體不  
奏甘泉泰時篇欲借方言行問字更從齊物證忘筌世途  
何限烏焉馬鳥迹那禁有變遷

東坡定惠院月夜偶出疊韻詩汪均之得其手橐墨

迹二首共一紙紙殘一角虞山錢宗伯補以細字

疊東坡原韻

東坡昔作騎鯨游斯文冥冥若長夜傳流片紙萬牛迴想  
見揮毫一鳥下細看濃抹如眉闊肯使奇才任胸瀉謫宦  
雖成蜀黨魁悲歌不作湘纍亞廟堂無地能爾容風月在  
天從我借經冬山竹碧初老駐春海棠紅未謝典竄豈因  
撫禊帖敖游自喜依僧舍往事真成牛角花餘甘幸比虎  
頭蔗眼前清景過始知身後高名生可怕作詩一笑公應  
聞當日好官誰復罵

蘇公手迹十四書張丑藏經幾晨夜蠟箋久作煙雲空粉  
澤誰看風雨下先生真放本精微後人僞體徒奔瀉一寶  
何期得雙絕四家頓使成三亞小乙鈞疑漢女藏大橫箸

向留侯借幾行補作肥鴉棲半角殘隨隙駒謝蠅頭細跋  
得蒙叟驥尾附名甘避舍況余書手同芽薑使我品題慚  
杖蔗催詩閑受古人忙得句喜過難韻怕汪君汪君慎守  
寶富人若求君可罵

題容靜止詩集

先師功業爛卿雲燕許常楊接世芬萬里天山新樂府三  
年人海故將軍慚余西笑重投迹喜子南歸得論文終是  
丹青圖畫客管城休策腐儒勳

澄齋來訝久不出因作此并呈石生明叔

十日不踏興勝寺張子訝我何深藏謂疑幽憂屬末疾豈  
知發興搜詩腸我初學此無檢束虞初九百恣荒唐稍參  
涪翁變詩派意趣結約無飛揚十年棄置久不事解散韜

帙從襪袂含毫叩景偶一試忽覺泥井生寒漿濃書細字  
急不擇螻蛄詰曲肥鴉旁到口有物當一吐安能啞舌如  
周昌古人精嚴有真放下手得快天機張六朝文士不解  
此散棄駿馬驅跛羊三辰分光精氣薄語言縮畜如羸疋  
雖然此中有涇渭豈得蕪穢誇汪洋句律稍悟嗟已晚嗜  
好多可無專場千金狐裘飾羔袖漢冠晉製兼唐裝吾文  
所病亦在此自成一家今未嘗當年猛志壓崔蔡翻恐汪  
魏相低昂先生不嗔後生笑所慮惟此餘尋常誰與吾黨  
二  
三子妙解知我非猖狂

贈潘諮少伯

當年豪士客扶風曾以鄉兵占首功談笑尙驚黃鶴子行  
藏欲問白鳥翁雨中裹飯勤深友日下繙經折鉅公莫訝



元文難索解應知並世有揚雄

讀東坡集有感

七載黃州已似家又從儋耳度年華東坡有地聊栽竹南  
海無人且看花白髮瞿塘悲劍器青衫滄浦泣琵琶飄零  
詞客多哀怨學道如公信有涯

書示張生端甫

我年未及十我祖授書時襟裾戒牛馬解授城南詩覆醢  
悲子路讀記淚綆縻謂我有文性祖亦爲噓唏先子留上  
都我母課中閨文選苦難字背誦行遲遲十九始出游雜  
覽如亂絲攬取得尺寸首尾終迷離吳門遇王涓交我顧  
廣圻語我六書學訓詁宜兼之凡校古人書不以他書資  
古書各義例熟玩窺其噉慚非性所好負此良友規頗獨

好文詞俳偶自娛嬉異之管君同謂此不足爲此猶冠玉  
耳不見骨與皮皮骨且不見安能爲妍媸是時文派多獨  
契桐城師洪鐘未殫叩闕響忽我遺言往理稍出徐徐會  
其機讀書如養生薰蕕不同脾豈食大官羊腥膻離虻蜚  
三史范已孱陳壽無華詞五代事簡略詞義獨恢恢老莊  
荀管韓國策逮楚詞淮南呂春秋譎詭而倡披六經爲稻  
梁此亦膏與脂不可一日無使人發華滋適口莫如約拙  
養聊自怡劉君稱漢聖董生書玉杯謝力有未能吾知固  
有涯吾子天骨高古風還可追鵠卵在啄抱庚桑慚魯雞  
儻欲師古人爲子誦所宜

偶成寄仲卿彥勤兩弟

柏枧村中有故基吾宗苦約返茅茨黃精藥好愁難遇蒼

耳林深恐見欺北阮家憐門戶改南陽阡冀子孫知飛橋  
一水千峯抱記取他年謁墓時

百年寄圃治城旁舊德猶存綠野堂祖父艱難留樹石弟  
兄奔走隔壺觴極知飲啄宜山澤又恐鳴號望稻梁空憶  
故園春色返半千閣下又青楊

戲書

未可稱居士頽然已放翁詩惟標腳氣文不愈頭風雄任  
來嘲客褒無待約僮雞毛三寸筆何事反怱怱

贈陳頌南

慰客車多似水流左遷君自百無憂同官何意遭閭奉直  
疏曾聞繼道州若訪石牛猶早計且歌金馬亦良謀書銜  
從此稱光祿謝鮑詩聲讓一頭

中秋夜訪冷公調不遇

佳節歡友生良夜念孤客叩門適不遇惆悵緩歸屐天街  
月舒波萬戶閉一白誰家酒兵闕豔豔燭翻隙歸來兒女  
譁對月學扣額祭拜未云已瓜果競分擘此樂諒無與只  
可近書策夜深奈明何相對惟脈脈

和座主湯敦甫先生游龍杖歌

春紅已退夏綠疏黃花未來人意孤誰歟發豔回春腴游  
龍作花紅扶蘇髮髯八尺堆珊瑚蕩搖秋空如畫圖世人  
但誇顏色姝豈知直榦中不枯忍使花落隨犁鋤我師巡  
圃爲踟躕試以爲杖輕若無刊落枝葉除根鬚以鐵爲距  
漆作膚策之穩步如安車子美桃竹能給扶昌黎赤藤杖  
自娛風流文彩二子都惜哉遷謫隨江湖豈若此杖忘畸



嘔侍師緩步留天衢七十謝政神籊籊春光澹沲梨雲鋪  
昆明芙蓉能白朱與爾同佩花間壺園官十客相友于乃  
知草木遇各殊赤藤桃竹愧不如豈惟赤藤桃竹愧不如  
孔光乃使靈壽污

贈邵位西移居

君別臨安山水來精廬應覺厭囂埃偶然移宅當金盃鎮  
可藏書著玉杯深院無風能媚竹小窗如畫忽橫梅漫言  
此是倪迂閣卻許詩人踏破苔

寄姚春木

曾訪夷門客大梁更尋耆舊溯襄陽秋風昨已歸張翰前  
輩今誰過孝章家食若爲三畝計國聞曾備五車藏陳編  
亦有平生志愧子逍遙一草堂

六月十二山谷生日邵蕙西舍人招吳子敘編修張  
石舟大令朱伯韓侍御趙伯厚贊善曾滌生學士  
馮魯川主政龍翰臣修撰劉蕉雲學正及曾亮凡  
十人集於寓齋舍人有詩屬和

夏幄陰陰四圍碧沈李浮瓜香拍席涪翁生日是今朝七  
百年逢吾輩客此翁翰墨如坡翁命宮磨蝎應相同春風  
官羊未飽喫荔支卻啖戎州紅主人詩派江西續喜借古  
歡招近局槐花韭餅雖已過黃雞作羹鵝掌熟新詩似擬  
鶴南飛共飲一尊歌此曲我亦低首涪翁詩最憐作吏折  
腰時只今更謫人間否安得停杯一問之

監利王子壽去刑部主政歸作詩寄之

君竟翩然返故居題橋應笑擬高車甯編荆楚歲時記不

讀司空城旦書詞賦飛騰聊自喜江山遼落興何如懷人  
若問吳門卒尙有詩狂未掃除

懷余小坡

成都有客返江城謫宦知君別後情向闕遲眠金雁驛留  
川閒賦石犀行論文每憶今無輩避地應聞我更生回首  
京華多樂事酒槍茗椀話深更

悼姚春木

君卒逾年我未知渡江猶寄贈君詩夢乖元伯真慚負書  
達劉侯已悔遲伊洛淵源周士貴國朝文獻漢官儀一編  
曾爲商遺集他日訂吾更倚誰

瑞元字容堂號少梅滿洲人蔭生道光辛巳舉人歷官  
湖北按察使殉難贈太常寺卿諡端節有少梅詩鈔

昨日乘言 卷一百三十一  
游焦山後江行三十里收瓜州口月夜過金山作

船從京口渡水向海門流島嶼一篝火芙蓉三面樓湖隨

明月上山入大江浮回首髻齡事金焦同日游

昔隨侍先君同日游

金焦山

楊豫成字立之號繹堂陵川人道光辛巳舉人歷官南

安知府有享帚集

蘇門山弔容城孫徵君

輸金慷慨赴燕臺忠義真能激草萊抗節一生輕宦豎及  
門兩代毓卿材伏生高壽傳經久邵子行窩適興來我過  
蘇門深仰止名山高士各崔嵬

登晴川閣

江漢雙流合登臨眼界開煙波橫極浦雲樹擁層臺一笛



仙人渺千帆估客來芳洲鸚鵡近作賦愧無才

陳偕燦字少香宜黃人道光辛巳舉人官福建知縣有

鷗汀漁隱集

林蕪谿曰少香穎慧絕人九齡見祖曝書中庭乞取  
昭明文選命以唐諺文選熟秀才足屬對應聲曰槐  
花黃舉子忙祖驚喜予之十二為文詩千言立就早  
登鄉舉九上公車不第以縣令赴闕權長泰惠安未  
久以憂歸一生數奇晚號咄咄齋居士吳蘭雪曰  
少香弱冠知名從余游於豫章見其詩如出水芙蓉  
天然秀絜阮芸臺中丞同賞之久困公車鬱勃蒼涼  
之氣時露篇章各體皆工七言歌行天矯離奇蠶叢  
獨闢一時壇坫  
幾無或先之者  
詩話少香詩秀脫豪宕江右自藏園蘭雪之後足據  
一席蘭雪與論詩謂當求味外味殆最其所未至也

舟中望五老峯

我昨買棹渡彭蠡北風打頭吹細雨廬山縹緲沒雲中九  
十九峯那得數朝來新霽湖光融船頭無數青芙蓉舟人

呼我看山起插天直指五老峯五老雲中稱遯叟商山四  
皓難爲友女媧煨鍊巨靈摩混沌至今形不朽九疊丹屏  
不可捫三橋橫瓦開重門香鑪列案紫煙裊其他一一如  
兒孫嗟余學道苦未得探竒不到長庚宅誅茅有約負重  
來坐令匡君爲惋惜今年四十已華顛五老相看猶少年  
山中石芝儻可得梨眉鶴髮真頑仙明當更與山靈約壯  
游何用誇五嶽徑驂白鹿從盧敖誰道長生不可學

登孤山

孤山屹立山形孤中流鑱鑰如門郭長江到此勢一束東  
去匯澤爲彭湖湖光右射若明鏡江水左洩難方隅銀濤  
澎湃地天杳渺視萬舸如羣鳧我疑禹跡親到處五丁策  
遣夷娥驅蛟龍窟宅一砥柱地軸鎮歷分吳都中流遣舄

事太褻彭郎遠嫁甯非誣古殿陰森試展拜默見翠羽排  
明珠湘君神女例廟祀十姨二姑何必無危欄下瞰不可  
極浪花倒卷奔天吳古今茫茫憂患積歲月忽忽江河趨  
下山擊楫浩歌去船頭颯颯吹菰蒲

金吾名馬歌

霜蹏騰踏獅花鞞天產神駿儲神用一朝事起奮奇功  
成死亦邱山重是時秋獮駐鑾輿小醜倉卒窺皇都行在  
肅靜寒刁斗羽書飛報執金吾金吾報國能忘身馬亦奮  
報金吾恩白礪路百五十里頃刻已達東華門萑苻掃淨  
渠魁縛汗血桃花如雨落地上麒麟死不僵天邊房駟寒  
侵角海內昇平用武稀酬恩已分終馳驅奚官入告金吾  
吁丹青曹霸能圖之圖成感慨繫以詩藝林屬和紛離披

同憶尋常無事時羣馬食粟同驂羈事窮見節身其危不  
爾碌碌終無奇馬兮何幸爲公知功名麟閣長追隨士死  
知己亦良幸感激因公增涕洟願公愛士如愛馬毋令遭  
逢出馬下

游棲霞寺作歌

山寺橫枕空山麓下瞰澄江浸寒綠十年有約踐何遲坐  
令山靈笑鹿鹿峭颿昨自京口來潮聲風力帆爭開船頭  
蔥翠忽吹墮瞥眼已見山崔嵬入寺但見山入山遙見寺  
寺藏山曲雲爲封山入寺樓雨飛翠翠卷飛濤天半起佛  
鐙無燄盪如水四圍苔色上蒲團一杵齋鐘出林裏我從  
塵境踏塵忙到此鬚髮森寒芒深潭晝黑龍腥出古柏巢  
空鶴夢涼層厓側巘不可數芒屨更入陰森處荒荒斜日



忽不明遮斷青松二百樹樹杪颯颯寒泉聲四時洞壑殊  
陰晴舊宅好尋明處士移家擬訪陶通明山下舊有六朝  
墓玉魚金盃成千古秋墳鬼唱血燐青歷劫山川一抔土  
逝將結屋乳泉東懸厓撒手尋遺蹤山中石芝儻可食不  
用貪看紗帽峯

黃樹齋侍御招同人讌集陶然亭時余將有玉田之  
行作此誌別

各有千秋想輸君早致身神龍方作雨病鶴尙依人去住  
情無奈悲歌意更眞明昕望南浦行矣孔璋貧

晚泊

知有人家在疏鐙出遠林魚龍腥夜市煙水淡秋陰月是  
詩人魄波洶壯士心吾生齊得喪何用歎華簪

許乃穀字玉年仁和人道光辛巳舉人官燉煌知縣有

瑞芍軒詩鈔

仲冬十一日雪後登泰山絕頂放歌

泰山高高四千丈拔地矗立青冥上狂來直欲捫青冥安  
得丹梯送吾往天風卷地浮雲開碧霞幻出金銀臺雪花  
皚皚塞巖谷長嘯亂踏瓊瑤來紅門以上忽奇絕峯巒黝  
赭鎔寒鐵氤氳膚寸瀾山頭瞥眼雲中一峯凸秦松漢柏  
枝交橫奔湍飛瀑聲相迎聳身入雲失雲影煙耶霧耶空  
中行摩厓擘窠隱復見模糊金碧梵王殿同游三子何處  
來咫尺聞聲不相見掣鎖直躡南天門石磴陡絕驚人魂  
瞳瞳紅日破空至一洗滢沔開乾坤下視塵寰在何許千  
山萬山一齊俛白雲如海足下生一色茫茫到天宇洪厓

天半來拍肩招呼更上日觀巔一杯明滅滄海水九點隱  
約齊州煙羸秦烈燄焚書史豐碑屹立都無字七十二代  
金泥封滅沒不知何處是吾儕遊戲人世間姓名豈必留  
塵寰舉頭天外發奇想御風而去何須還

暮宿東嶽廟

塵世茫茫感今宵得暫休十州同一夢百歲此浮漚噓氣  
吞江海騰身出斗牛摩厓碑畔宿心與白雲游

和魏春松師孤山探梅寄懷元韻

西湖作香海倒浸翠微嶂花開人未歸清夜夢來訪一笑  
花底眠鶴子悄相向夢醒邊微羈那得任曠放天山五月  
雪寒氣逼朝望見雪不見花雪在青雲上龍門天際遙矯  
首萬山障奚止故鄉情惆悵難具狀何時從杖履一舸中

流漾晨興摘花餐夕歸答漁唱未了文字緣亦頗林泉尙  
風塵豈初願樛材勞哲匠歲月嗟蹉跎消得屐幾兩餘杭  
酒百壺神王興酣暢醉寫尋春圖渴筆見力量

施彥士字樸齋崇明人道光辛巳舉人官萬全知縣有

### 求己堂詩集

詩話樸齋通疇人術春秋三十七日食唐一行推得  
二十七宋衛朴推得三十五樸齋推得三十四惟襄  
公二十一二十四兩年連月日食衛朴以為可通樸  
齋謂古今曆法不能得又撰歷代大事表得乙部之  
綱要詩用擊壤  
體蓋非所長也

### 端陽前二日度葦蕪嶺

五月葦蕪嶺輕裘晚尙涼椒纔鋪地紫麥待伏天黃數點  
犁雲犢千蹏曝石羊深山消溽暑人境卽仙鄉

劉鴻庚字西垣浙江山陰人道光辛巳舉人官漢陽知



縣殉難贈知府銜有青藜閣詩鈔

由長沙赴衡州訪高螺舟太守舟中感賦

帆力健於馬長沙頃刻過雲遮衡嶽影雪壓洞庭波舊友  
分榮辱窮途受折磨未知東閣畔梅萼放如何

登沔陽新隄澄瀾樓

十二年前暫典州曾無暇日快登樓此來春水生江漢試  
倚危欄瞰斗牛波起洞庭皆北泛雪消巴蜀盡東流尙書  
砥柱功勳在祇要修防處處周

蘇宗經字文庵鬱林人道光辛巳舉人官新甯學正有  
醴江詩草

漂母祠

世俗薄寒士那如一漂母異眼看王孫一飯亦不朽太息

淮陰子才高數不偶既報飲食恩難事司晨后有力同逐  
鹿無智免烹狗生死事太奇都在婦人手畢竟愛才者食  
報自長久祠廟小如拳千金能買否

劉廣智字德明又字智孫號愚谷番禺人道光辛巳舉  
人官澄邁訓導有簾青書屋詩鈔

陳鹿萃長甫兄西君弟過書齋與門人對月同酌

晚飯魚蝦果菜充一筵師友弟兄同簾波酒影初更月花  
氣茶香小院風雜坐形骸忘主客屢空瓶益笑兒童還期  
刻燭連宵詠不厭儒餐脫粟窮

張海珊字越來一字鐵甫吳江人道光辛巳舉人有小

安樂窩詩存

詩話鐵甫與同里張開父交莫逆論詩自謂好爲窄  
眇超脫之致而刻畫清微澄然風露之表則開父所

獨得己不能到也辛巳榜前卒主試湯文端爲作傳稱爲明體達用之彥得其人而不收其用極惋惜之  
曉起翠微禪院

曉色孕太清澈心成寒碧了了新境來忽忽昨夢隔初看  
眾綠分漸覺諸峯闢萬瓦靜撲地一煙動孤白微吟重闢  
戶珍此夜氣積

尋仙源玉笥三台諸洞

名山如偉人洞達無內外軒然肺腑張癥結盡淘汰第一  
稱仙源卉木交晦靄三台次第列眾石互鉤帶逼塞開堂  
皇摩空揚旌旆九曲綠螳通一綫受天大奇險絕世狎訝  
舒動天籟遂令風塵魄窅然坐遺蛻

冒雨同竹坡徧探攝山諸勝

秋雲抱雨意欲吐未能暢變滅四山間山山爭殊狀一山

橫而趨如與塵世障透池樵徑轉四山拱相向驀入與雲  
爭迴出雲之上一身著虛空悄焉心胸盪氛氳木犀香隨  
雲徧空漲香空渾相合何處辨真妄

秋山寫蒼潤筆筆骨勝肉出力露鋒稜而不病老禿雙澗  
分飛流怒與眾石逐東澗勢尤峻勁折如轉轂盤辟磴道  
中恰與西澗撲探之源深深屢上山屢復雲白徑微分石  
青氣自馥此中大人經聲出茅屋

山虛滅眾聞一磬戛空翠數轉般若臺知是散花地老松  
作龍飛一一鱗甲棄遺形猶攫拏商焱落清吹無著野雲  
姿不盡溪水意活脫此心妙以受煙霞媚

同盛眉庵攜諸童子走湖干看山

微陽發春妍生意脫寒縛萬物觀其始卽此道妙託童子



攜三五潑潑態可掬臨水坐不次得意同一躍積水何澹  
澹眾山方莫莫遙天見斜照明翠蕩無著一點白鷗來偶  
與虛空泊須臾天風起鼓舞波濤作落落寫琴聲和我山  
水樂冥坐與心融邈然塵想廓游盡意不盡歸途亦綽綽  
入翠峯寺上西岡待月

秋陽播餘驕不奪山行勇喜劇松風來飛落山翠重沙崩  
路忽側泉駛石故壅倚天峯勢厚拔地眾木聳呀然佛宇  
開金碧萬綠擁太古寂更寂開雲動無動曠然我神善以  
受煙霞奉

夕景上東嶺暝色起諸壑獨立斂視聽無言合冥漠妙哉  
此寸靈與月同一躍玉宇開虛空游氛掃塵廓下射三萬  
頃瀕洞魚龍作仙風澹澹來佐以諸天樂

晚渡石湖

水煙忽上白漸沒青山杪不知雙橋明全約一湖小山店  
不成市入夜人聲悄弦月忽悠揚併與西風嫋交秋已半  
月殘暑苦未了所賴夜氣清聊道毒熱惱知心通冥論矯  
首凌空窅直出飛鳥先孤雲同縹緲

梁紹壬字應來號晉竹錢塘人道光辛巳舉人有兩般  
秋雨庵詩

闌干

秋千容易下斜陽一帶參差蛤粉牆有限樓臺添曲折無  
邊風月要關防屏山春鎖紅鸚鵡棟井宵迷綠鳳凰捲起  
珠簾三十六有人背手繞回廊

羅韞無聲下玉階碧紗窗下小徘徊儘工宛轉和愁倚不

斷連環放夢來曲曲重門通隱約弓弓步履費疑猜閒庭  
盡日憑誰掃隨意春痕漬綠苔

鮑作雨字雲樓瑞安人道光辛巳舉人有六吉齋詩鈔

巖瀨

故人極富貴先生恆守貞坐釣澹眾慮非沽高尚名我今  
返舊廬澄波濯塵纓山花莫相笑瀧水知予情

歸詠

我來定海游不睡定海井晨衙炯周防夕柝集深省孤傲  
笑難降參諮恧多幸晶晶海色澄斤斤軍行整山光入北  
牖仿像羲皇境衰眊怪善忘老嬾苦便靜遺響流達鴻遁  
跡隨野屣還往桂花時彌年信俄頃憶昨颺母飛摧絕估  
檣影急雨傾天河十日餘涼冷才覺宿疾瘳且喜塵事屏

無睡神亦恬微吟宵轉永

鷺嶼吟寄京華故人

鷺嶼巖立南海中奔騰決莽來天風層巖峭壁勢飛動  
如萬馬聲行空昨日春過二月半吳綿卸盡還揮汗一夜  
寒風盪宿温無冬無夏朝朝換我來鞭石驅神鼉長颺飛  
御尻輪飄振衣直上蓬萊頂東西烏兔窮秋毫紫鸞鏡水  
矜羽毛長吟龍笛生波濤更誰遺我昆吾刀斬蛟截鱷青  
天高積氣重溟水翻墨黑雲萬里動春色玉堂美人在帝  
側且向天南望天北

桐江舟中

水向西流人向東今年光景昔年同紅燈畫舫游天上翠  
嶂雲嵐落鏡中峽轉駭翻三尺浪月明穩挂一帆風勞勞



塵鞅誰能脫，羞見羊裘垂釣翁。

何殿春字寶錫號紅藥，新會人。道光辛巳副貢，有晚香

草堂集

龍王宮晚望

臺殿鬱岩堯，南溟入望遙。溼雲龍戶雨，殘日虎門潮。葉墮  
三城暮，天高一雁飄。迴飈起蘋末，長嘯動荒椒。

過鍾澤流故居

翠合葵陰夕，照斜溪潮初。縮見瓊沙三，間老屋寂無主。幾  
樹野梅寒，有花耽酒縱。能娛歲月參禪何，遽住煙霞蒼茫  
獨立頻搔首，風撼枯楊起暮鴉。

翁心存字二銘，號邃庵，常熟人。道光壬午進士，改庶吉  
士，授編修。官至體仁閣大學士，因病乞休，復起以大

學士銜管工部贈太保諡文端有知止齋詩集

詩話文端幼慧七歲能屬文唐陶山見而奇之使從授學淹貫經史百家言及貴務持大體尤以引拔人材爲急而不居其名久贊講帷因事納誨計慮深遠發爲歌吟亦有許謨定命氣象諸子並顯世比韋平繫海內士望焉

題王藝昉江南詞後并示香谷

譜就江南絕妙詞  
王郎愁緒正如絲  
尊前莫唱家山好  
腸斷青楓月落時

野田黃雀行

游莫逐雕陵鵲  
棲莫近瑤臺鶴  
瑤臺露冷鍛羽翰  
雕陵風高遇矰繳  
黃雲夾隴梁  
稻肥關河阻  
絕不得飛鷗  
波浩蕩  
鳥道嶮巖鷹鷂下  
視爵羅高施  
黃雀行聲正  
悲野田餘粒  
啄欲盡蓬蒿  
滿目將安之

棲霞阻風

塔杪鈴言替戾岡果然旗腳轉危檣荒蘆撼撼戰秋雨衰  
柳垂垂空夕陽鷓不因風先自退山如欲語笑人忙支離  
病骨餘生在肯逐冥鴻下上翔

藥師院看新竹

江雲帖帖南浦飛江城清夏晝掩扉鄙人生無肉食相冷  
嚼冰雪骨不肥尙餘一點俗緣在妙藥欲仗空王醫芒屨  
徑踏藥師院沙路細碎行人稀深篁苞綠掩金碧煙外但  
聞清磬微叩肩拄策得幽徑墜粉簌簌沾人衣龍吟鸞嘯  
眾仙下琅玕萬个羃四圍連天一氣碧雲合不知林外停  
炎曦移時靜對坐磐石橫出旁茁無不宜嫩黃便娟態嫋  
嫋空翠匝匝香霏霏玉聲玲瓏風解籜金影瓌碎波含漪

初生勁節不數尺鬱鬱已具干霄姿脩柯似放一頭地轉  
以側勢相撐披山僧頗解禪悅味留客且住攜軍持洗鉢  
細烹葉上露兩腋習習清風吹內觀了了見癥瘕如飲大  
藥調上池渭川千畝貯胸臆千戶侯吾不願爲癡心思乘  
籜龍醉呼童斲取捆載歸寒酸笑殺白司馬苦竹繞宅哦  
新詩

有感

人子朝暮出倚閭尙徬徨千里與萬里極日何能望嚙指  
忽心動引領祇內傷伊余髻鬢時隨侍於胸陽山城霜月  
苦講舍秋風涼母續兒夜讀共此鐙燭光兒方治毛詩讀  
至四牡章掩卷忽有感清淚含兩眶阿母願兒笑願兒學  
范滂矧當太平時馳驅敢或遑男兒志四海安可戀故鄉



長跪謝阿母教兒以義方忽忽四十載膂力猶幸剛吁嗟  
奉英蕩何如菽稻梁

出山海關

王氣東來接柳條長城西去盡臨洮雲屯萬雉環山海天  
設重關劃薊遼三輔風煙開莽蒼兩京筦鑰鎖峩嶷鯨波  
不動蒼煙碧億載皇圖鞏聖朝

過無錫有感

春風吹綠滿平蕪路入梁谿水驛紆山色宛同鄉國好泉  
聲還似舊時無愁聽子夜唳烏鵲怕說寅年足虎貙欲問  
元戎駐兵地沙邊煙雨總模糊

自題藥洲訪石圖

崢嶸蜃閣排空出天遣薤藏付童律神龍拏攫守榕根下

有驪珠三十一英光長閱七百年鬱律蟠伏全其天悔將  
混沌書眉手鉤取裝賓躍九淵自從剔蘚鐫苔後夜夜乾  
文射南斗豈有夸娥負以趨只愁寶鼎終遭培羊城眼底  
風塵昏劫火燒殘字儻存升沈顯晦孰得失可惜玲瓏石  
不言

李棠階字樹南號文園河內人道光壬午進士改庶吉

士授編修官至禮部尚書諡文清有李文清公詩集

詩話同治初元登用老成文清其一人也正色立朝  
遇有大政事讜言侃侃中外傳其風采詩頗涉理趣  
集有口占二絕句自注云吳佩齋夢行夾牆間幾不  
得出子謂何不拆之拆盡天下之牆則天下一家中  
國一人豈不游行自在其意  
趣襟度亦即可見一斑矣

貴西道中

斫得松枝自煮茶貴西風物最堪嗟林稀偶聽一聲鳥地

暝猶開十月花  
緣路氈衣苗子俗  
半山茅店候人家  
蠻煙瘴雨荒涼甚  
徑仄崖傾日又斜

喜晴

雲雨浹旬殊悶絕  
而今喜見日晴時  
肩輿一路看紅葉  
夕照半山吟杜詩

渡星宿江

穹浪翻空夜有聲  
河清門外一江橫  
火敦地古探源近  
祿琤煙深繞郭平  
南去波濤添瘴雨  
東來輿馬阻郵程  
何人駕得鼉鼉背  
十丈虹橋指日成

和楊升庵采蘭引

上山采幽蘭  
幽蘭苦無多  
秋草隨山深  
萋萋被巖阿  
抱芳立空谷  
豈雜薜與蘿  
采之遺相思路險  
雲雨過蒼翠日滿

眼復恐蓀芷訛蓀芷訛猶可蕭艾將奈何

響琴峽

峻坡下千丈微徑兩崖逼峭立半空懸怒束一溪窄鳥獸  
森絕蹤蛟龍踞窟宅天寒蟄不起煙雲滿山澤我來踏長  
虹慨然擬鞭石魚梁名自古響琴理亦適空懷山水情不  
見滄海客驅馬登絕頂迴看邈行跡獨立千仞岡舉首日  
華赤

羅文俊字泰瞻號蘿村南海人道光壬午一甲三名進  
士授編修官至工部侍郎有綠蘿書屋遺集

詩話蘿村工於館閣應制辭  
賦傳詩不多絕句最擅風調

甘涼途中雜詠

闔門列戍擁飛沙毳幙氈裘久一家飲馬長城天似蓋亂



紅開徧戰場花

榴紅艾綠記江鄉客久真教歲月忘誰信烏梢山下路雪  
花如掌過端陽  
雙旌獵獵鎮飛揚畫角聲聲說故鄉立馬平羌臺上望萬  
株紅柳倚斜陽

冬筍  
吉年字秋畚滿洲旗人道光壬午進士歷官順天府尹

喚起靈根臘雪初稚龍風味妙何如新班早已先春薦直  
節由來重歲餘極冷淡時登鼎鼐露圭角處謝苞苴席珍  
預共櫻廚獻肉食何妨盡屏除

沈丹槐字香巖嘉善人道光壬午進士改庶吉士

冷泉亭

清興健籃輿游跡隨蠟屐一往寒煙生其上列松柏空山  
落葉深沒盡青芝跡云是冷泉亭清泉流白石泠泠綠玉  
寒藹藹蒼煙積碎作琉璃聲瀉落石罅窄畫屏青巉巉倒  
影浸石壁緬懷香山翁登臨憶疇昔游者信如斯美人一  
水隔濯壘盛冷雲掃葉烹玉液坐久萬慮捐茶煙具空碧  
趙似祖字秋客山東海陽人道光壬辰進士官刑部主  
事有希音閣詩

田橫島石硯歌

田橫兄弟能得士五百英雄同日死蒼茫孤島葬英魂夜  
夜靈風吹海水水中突兀生雲根碧血斑斑浸清泚落日  
寒潮沒遠空老蛟捧出霞天紫陰雲潑墨黯黯飛魚龍呵  
護終不毀有客探勝游東萊攜歸置我烏皮几摩挲三歎

秋氣高義士精靈今在此燃燈陰夜光青熒振筆疾書驚  
且起筆端恍惚鬼神來口噤海濤落滿紙

旅次卧病得家書卻寄

繩榻相扶形影單滿庭落葉夕陽殘病深生死真難料客  
久風霜倍覺寒忽有家書問消息仍將旅況寫平安高堂  
白髮垂垂老省得開封掩淚看

秋月宿嵩山禪院

石笏碧嶙峋松關夜色新涼秋變霜露高閣帶星辰樹老  
偏橫路僧寒不近人繙經然佛火頓欲解聲塵

吉珩字茶農滿洲旗人道光壬午進士歷官保定知府  
有求放心齋詩鈔

過寶塔灣

昔日寶塔灣流水去復還今日灣前水流去何時已水流  
無已時游人傷別離

居庸道中即景

纔過雄關下石巒迴開別境畫圖間天低遙似繞村水雲  
斷橫如隔岸山縷縷炊煙爭樹出行行歸鳥認巢還宵征  
為惜輿僮苦空負西斜月半彎

張維屏字子樹號南山番禺人道光壬午進士由知縣

歷官南康知府有聽松廬詩鈔

詩話子樹早有詩名與譚康侯黃子實號粵東三子  
以詩游京師一時傾倒覃溪稱爲詩壇大敵嘗編詩  
人徵略又爲藝談錄錄攬撫詳備有  
功文獻詩高華沈著不專一格

上元後三日同金茂園胡蔚巖汪撫中買舟過馮子

皋森竹園



春在山顛又水涯一枝柔艣劃漣漪  
暝風吹我意常醉村路引人行不疲  
雞犬聲從深樹認田園味讓老農知  
菜花香處柴門掩寫出儲王畫裏詩

雨泊波羅坑

旅食路方永獨眠寒易侵  
春江流客夢夜雨滴鄉心  
煙溼帆移墨村荒藥抵金灘  
迴風益怒未礙裏頭吟

都門秋思

天半清霜壓怒鵬  
嵯峨樓觀倚丹霄  
白河雁去傳秋信  
紫禁人歸賦早朝  
夢裏蓬蒿蝸舍遠  
眼中塵土馬蹏驕  
思鄉懷古愁如海  
轉覺名心似落潮  
刀翦能傷獨客心  
授衣時節怕登臨  
千秋葉落羣鴉舞  
五夜風來萬馬吟  
種地幾人收白壁  
築臺從古重黃金  
哀絲

晚晴雜言四卷一百三十一  
三十一  
豪竹朱門裏秋老都成變徵音

泛舟西湖

天光碧若湖湖光清似天衣裳忽異色我坐萬綠邊既罷  
樹下酌遂登湖上船船頭見我影酒醒涼娟娟柳深百蜩  
唱荷淨雙鷺拳艣枝撥水柔磬響隨風圓高峯吐白雲縷  
縷如輕綿卻瞻黃妃塔界破南屏煙

九日粵秀山登高

夜聞花塔風鈴語明日天當不風雨曉來萬里無纖雲倒  
挽澄江洗天宇峩峩南城公有似古歐陽山水之間得真  
樂春秋佳日可以對客傾壺觴我時幅挾伏閭里公來挈  
我翠微裏坐我越岡之側楚庭之巔吹我以五仙觀上之  
靈風滌我以鮑姑井中之甘泉酌我以鷺黃鴨綠之美酒

示我以瑤繩金檢之奇篇使我沈憂得釋煩痾得蠲左把  
稚川袖右拍安期肩飛觥脫帽銀海眩斗覺南溟雲氣浮  
樽前五羊城中十萬戶下視漠漠蒼蒼然有人山下一矯  
首望見酒龍詩虎皆神仙不知今日海內名山百千億幾  
人高會羅羣賢朝臺安在哉歌舞亦消歇王宏頗解事長  
房莫饒舌茱萸之囊繫臂求長生何似菊花之酒長不竭  
百壺欲盡醉兀兀風馬雲車去飄忽山頭客散山不孤一  
片飛來漢時月

客夢

客夢隨川曲羈愁逐夜長枕邊千里水篷背五更霜村小  
雞聲冷庖豐麋肉香道旁聞說虎獵火近前岡

山村春曉

雞鳴山外村村樹曉煙碧人行細雨中一路看春麥

姚柬之字幼樁一字伯山桐城人道光壬午進士歷官

大定知府有伯山詩集

阮芸臺曰五律精論非盛唐以後之詩張翰風日伯山詩各體絕人七律尤沈鬱高亮情文相副質厚而氣清句鍊而格渾張南山曰豪驅廣陵之濤清挹峩峩媚之雪五律得少陵之神非同貌似詩話伯山初宰臨漳繼任揭陽斷疑獄治械鬪政聲卓越後擢大定郡守持大體不附和上官謝病歸詩有雄渾之氣五七言近體尤亮拔不羣寄意深遠一門羣從中與後湘殆如驂靳

北邙

朝發廣莫門夕登北邙山山側無居人白雲相與還宛彼  
劉太尉威名震八蠻巍巍勸進表惻惻憂時難天道不可  
知匹禪師嘽嘽英雄千古恨流涕傷心肝

滄江



風寒謝家聚雪壓毛公山人事悲何極滄江去不遺消愁  
詩自解久病鬢先斑更少逢時伎煙波處處艱

湘水懷石甫

歲晚湘江上北風吹正哀靈均千古恨賈傅一時才生事  
留詩卷餘情託酒杯隄邊逢驛使不敢寄寒梅

葉家洲

詞藻空南國飢寒返舊廬風雲催日暮星月落江虛短髮  
悲春去丹心又歲除食其貧落魄悔讀未焚書

二臺

山河雙闕險風雨二臺尊浪破天無岸雲垂海有門親朋  
斷消息衰老在乾坤欲採楓香汁靈丸製返魂

葺吳蘭雪祠感賦

後死留吾在前塵爲汝哀文章眞寂寞祠宇已蒿萊此日  
論應定當時事可哈陽明陪俎豆落月好歸來

自古遭讒慝多緣秉軸臣爾亡由市僧我病爲儒巾雲散  
蠻荒雨天高京洛春平生多縞紵誰復念陳人

陳思王廟下作

九詠深知孤客悲西園夜宴不辭疲文章帝子難爭命落  
拓才人空自隨斜日荒祠棲蝙蝠秋風故宅長江薜茫茫  
又觸千秋恨玉軼雲旗有所思

潁口

丹楓黃葉潁城西淮水湯湯出古黎野鶴於人恆皎皎飢  
烏何事復淒淒眼空京洛青天遠髮短江湖白日低安得  
瓊蘇南岳酒沙頭一飲醉如泥

試院春陰得故人左匡叔書遂答丁茂才

飄風吹雨上雕闌瑣院深沈怯曉寒雞鶩喜陰爭握粟鸞  
皇愁溼振雲翰故人寥落書來少貧賤交游語易酸賴有  
丁儀慰岑寂漫寬杯酒暫爲歡

汲黯

中朝讜論久無聞一語猶能感聖君可惜經生漢丞相不  
如奴子衛將軍崑崙使自窮青海封禪書傳起白雲下詔  
輪臺嗟又晚眼前刀筆總深文

鄒堯廷字松友漢陽人道光壬午進士歷官祥河廳同

知有留耕堂初稟

梅伯言曰松友詩清而涵美而深其邁  
往不屑之致使人自得於言意之表

雜詩

明詩話卷一百三十一  
貧居慕作宦作宦依然貧回頭更自笑馳逐徒踐踐秣陵  
古項國風俗苦未涓閭閻鮮生計何以稱撫循對此孱弱  
區相顧徒艱辛謀生尙無術安能求富民厚實人所羨清  
白守吾貞笑彼蘇季子多金焉足珍

巖疆數十里良楛各異族地連潁與亳獷悍習成俗頗聞  
道旁言謂我少嚴酷撫心良自慚十載負民牧一邑如一  
家痛癢關骨肉如何治子弟忍事日鞭扑秋霜豈不威未  
若春風燠頽習詎難移惜無仁者術

蓋鈺字式如一字玉山蒲台人道光壬午進士官佛坪  
同知有奚囊草

游仙游寺

從游來勝地古剎訪遺蹤竹暑聞清磬松涼納遠鐘崖花



迎面發澗草染衣濃無限登高意山深更幾重

何熙績字春民靈石人道光壬午進士官肅甯知縣有

擬琵琶亭懷古

擬琵琶亭懷古

一葉潯陽送客舟荻花瑟瑟水悠悠江州自有青衫恨不  
聽琵琶亦淚流

裁衣曲

料量刀尺故遲遲費煞停鍼不語時欲覓平時寬窄樣恐  
郎愁減舊腰支

贈苗仙露

君卿甘寂寞長日閉門居不入宰官室誰知處士廬案頭  
君子篋牀上古人書咫尺衡相望何緣蹤跡疏

翟云升字舜堂號文泉掖縣人道光壬午進士廣西卽

用知縣有五經歲徧齋詩橐

詩話文泉成進士後不樂仕進  
家居以翰墨自娛工八分書

題屠芑堂狼山題蘇圖

平生癖嗜古歐趙思繼踵遇石墨鐫華心爲子函動吾友  
推屠公探奇賈餘勇側聞有狼山突兀海波湧嶺谷叢莽  
中豐碑數十種石花苔蘚斑蝸涎泥沙擁模糊幾經年點  
畫皆翳壅著屐盡搜剔籀篆窺汲冢蓬萊五色雲三島眾  
仙影輝映古碑文天地開奇景紀詩並繪圖垂之千秋永  
我今幸獲覩興復馳寵崑崙願得一一手拓置巾箱與我琳  
琅金巖同珍重

和石農文別駕

十年冰雪冷官衙師友相看鬢已華  
投贈欣承常棣詠催歸轉恨木犀花  
離懷落寞奠三杯酒世事蒼茫七椀茶  
尺素頻遺同會面不須飲淚聽琵琶

晚晴移詩匯卷一百三十終

湖湘錄 卷一百三十三

...

...

...

...

...

...

...

...

...

...

...

...



晚晴移詩匯卷一百三十一目錄

徐大鏞

二十九首

李枝青

五首

張培金

一首

袁翼

三首

崔光笏

一首

韓鼎元

一首

朱世重

一首

鄭民鑫

二首

麟魁

一首

黃爵滋

二十一首

吉明

二首

雷以誠

二首

池生春

一首

湯鵬

十五首

沈濂

六首

徐感持

三首

朱蔚

一首

孔憲彝

六首

黃文琛

十三首

余正酉

二首

朱駿聲

六首

黎愷

一首

明倫彙編 家範典 卷一百三十一 目錄

管同 一首

六首

張琚 一首

黃文毅

十三首

余玉西

二首

朱諫

一首

許顯

六首

沈謙

六首

翁汝

三首

邱主春

一首

謝

十五首

吉

二首

雷

二首

魏

一首

黃

二十一首

宋

一首

曠

二首

崔

一首

韓

一首

張

一首

袁

三首

翁

二十九首

李

正首

御制錄荷圖卷一百三十一 目錄

晚晴籀詩匯卷一百三十一

徐世昌

徐大鏞字序東號蘭生天津人道光壬午舉人官杞縣

知縣有見真吾齋集

詩話叔曾祖蘭生先生詩法香山流麗清雋自抒性  
靈真摯中尤多見道語蓋以儒者入官通知今古躬  
經憂患安命委時年登大耋翛然物外寄意吟詠亦  
與香山相似佳句如蘆花云一痕秋水人何處九月  
霜華影共飛雨霽云雨餘花力怯風定樹陰圓早發  
春晴云晨氣連畦潤河聲抱郭流送藜青弟回泚云  
塞雲初起雁歸去野水自流鷗獨眠病中作云無力  
飛鳴憐凍雀有時神俊愛秋鷹放言云花留賸蕊無  
人折蘭有孤芳轉自燒二月初九日紀事云盛  
世自多寬大詔衰年難作太平民皆可誦也

月夜偕高寄泉訪樹君先生不遇

滿地月明夜攜行高逵夫幽人不可卽願影生踟躕霜鶴  
一聲唳寒梅花著無歸來眠未穩夢已到林逋

明倫彙編 家範典 卷一百三十一  
寄和梅樹君先生見懷原韻

吟到懷人句憐才獨有君  
光陰殘嶺雪心思亂山雲浪跡  
成何事羈愁不可聞  
北風吹斷夢離緒觸續紛

病中遣興作六言詩

水田十畝五畝竹溪三灣  
兩灣猿鶴不能久待問君何日  
買山

見燕營巢感而有作

檐前紫燕雙飛鳴銜泥啄草經且營  
自晨至午巢已成燕  
燕成功何其速千里關山聊託足  
瞻烏知是誰之屋舊時  
栖息王謝堂珠簾畫棟春風香  
喃喃絮語心悲傷

短歌行

芙蓉泣露秋江空  
杜鵑嗥血枝枝紅  
空山落葉掃塵下蒼



涼眼底皆蒿蓬滿堂美人美且都瓊筵旨酒無時無屏間  
翡翠光如電枕上鴛鴦夢不孤回首故人多厚祿賸有寬  
禽填海獨海天風露九秋高一葉飄零聽怒號到此塵緣  
都解脫還向琴書討生活石破成塊堅不移朱研作粉色  
難奪

山居漫興

山色空濛裏風寒古木號雲遮殘嶺斷石激怒泉高到此  
心如寄真教影亦韜閒居何所事終日讀離騷  
久已名心淡思歸不自今轉因棄簪組始得遂山林風急  
秋碓碎天陰戍鼓沈羈愁眠不得枕上自長吟

放歌

唐衢痛哭清猿哀孫登大笑山花開至情流露出肺腑一

哭一笑眞千古世事悠悠良可嗔常垂青白眼看人人心  
不同如其面可憐哭笑皆非眞君不見羊志急眼淚雙雙  
豈爲貴如墜又不見太傅讀儀文冷笑難逃國土刺三代  
直道不可留我今閉戶謝交游無端晚歲投荒壤霜雪欺  
人半白頭白頭不用傷遲暮廬山眞面猶如故

閉戶

閉戶少人到相依有影隨卻愁惟醉好多病與閒宜邊迴  
秋來早山高月上遲一聲長笛起吹動故園思

游仙曲

仙人所居在蓬島門前一色金明草玲瓏樓閣十二層層  
層但見綠雲繞中有雪膚花貌人手把芙蓉掩翠輦玉女  
侍妝環曉鏡青童持帚掃香塵銀屏池邈開雙扇傳聲將

赴瑤池宴排空五色駕雲車短尾青龍奔似電九天磬咳  
落珠璣偷看羣仙笑語嬉羣仙齊唱春歸曲驚醒游人尙  
未歸子夜清歌歌且舞天公亦解別離苦溪頭開盡白菊  
花春淺春深寂無語

秋日漫興

頻年偃蹇走荒山老去誰知遇更慳人以苦吟防早睡天  
緣好懶與長閒涼生斷角殘鐘裏秋在層巒疊嶂間厯盡  
風霜驀回首幾行鄉淚背人潸

秋風秋雨病相如冷暝誰來問起居作吏未餐一升飯投  
荒補讀五車書已甘小謫成禪蝨賸有閒情辨魯魚白日  
昭昭何處去空餘團扇墨痕濡

塞上曲

陽斷龍堆馬邑前胡笳一曲最悽然雲橫玉壘千盤嶺雪  
壓雕鞍六月天寄遠竇家新織錦投荒蘇武久餐氈逐臣  
放士知何限青鬢來時白髮還

漢磧秦城望欲迷百年興廢草萋萋風吹木落駝銜尾沙  
擁桑乾馬裂蹠此日雄圖歸冀北誰家清夢破遼西清時  
絕壤皆耕種無地喧闐著鼓聲

輓張船山太守

天遣蓬萊作謫居陶山轉世定非虛

公生於館陶有陶英山多恐是前身句

年射策科名早中歲辭官宦興疏足跡幾窮天下路眼光  
不泥古人書詩壇酒壘堅無敵一氣如雲自卷舒

芸館蘭臺閱廿春常留鄉夢在峨岷官居清祕才原稱詩  
到空靈性最真出領三山仍舊籍歸辭五馬亦前因神仙



不慣風塵住東海難回勇退身

出山泉似在山清入世人多避世情窮到昌黎文送鬼痛

深工部筆談兵

謂寶雞題壁諸作

萬千著作傳須福五十年華夢

太輕料得西方千佛引

公寄萊人詩夢隨千佛到西方

止餘魂返錦官城

公未抵蜀卒于途歸時年纔五十

未遂擔簦謁大賢予生也晚恨無緣廿年每苦思張緒三

絕真堪繼鄭虔姜被自多春草得

集中與尊兄亥白公唱和最多

和衣又

許老梅傳

活上梅樹君先生出公門下

不須伯道悲身後身已千秋澤

豈堙

讀白樂天覽鏡喜老詩欣然有作

行年六十四衰羸已如此心為境所役多憂少歡喜如木已成灰焦勞伊胡底忽讀樂天詩不覺恍然矣涇涇小人

哉所見何其鄙試觀同氣中皆無逾我齒兄弟六人地下余年居長

已三人生存僅半耳更觀同游輩不必遠為指即以今年

論兩作故人誅春日亦吾亡郭君鳳恩夏月虞卿死方君長治年皆

少於我忽焉成新鬼彼獨胡為然我又何所恃略無災害

侵歲歲籌增紀所以白樂天恬然安杖履無戀亦無厭樂天

句知足乃知止覽鏡自喜老胸襟此何似一編長慶集吟

玩日無已可化福急心可悟盈虛理始知我一生亦既受

帝祉自問何德能恐尚不稱是行將開七秩未嘗勤四體

不用守庚申又免呼庚癸雖無少傅尊亦曾忝祿仕雖無

履道居亦悔營宅第樂天況無兒我已有孫子當喜不當

歎樂天歡娛從此始

錦屏山歌

疊翠蒼蒼密無縫老龍氣奪丹山鳳杏花橘柳無一株萬  
千松柏排巖洞後凋但覺四時青武后臨軒始得名七襄  
織出天孫錦百寶裝成雲母屏游人先自西麓上香山寺  
宇何清爽紅闌干倚碧嵯峨表裏山河猶運掌召伯留侯  
思叔祠三祠各占一峯奇巍然鼎峙白雲裏蠟屐未登齒  
折矣東峯絕頂洞賓樓樓在老君堂上頭陶公洞又居其  
下煙霞亭是仙游者仙人蹤造化工看來都在此山中不  
然萬千松柏靈氣鍾何以前山後山無一叢

過洛陽留別汪東初

三月春光信欲殘雨餘猶怯曉來寒輕裝重整歸原易好  
友初逢別轉難伊闕林巒詩境遠香山煙雨畫圖寬  
東初  
工詩  
畫洛陽紙價從今貴博得公卿刮目看

老病

老去原非與病期，病來偏覺老堪欺。  
恐將損肺先停酒，怕欲嘔心漸廢詩。  
獨醒最難銷永夜，兩餐已是減平時。  
衰軀應似霜前草，眠食分明報與知。

讀香山送愁還闌處，移老入閒中。  
句深有味乎其言，因賦此詩。

愁本生於闌，老須償以閒。不難移以入，所賴送之還。爲此詩者，其知道我今讀之恨不早，可以大歡喜，無地著煩惱。可作小神仙，有生博壽考。君不見市上紅塵熱，於火炙手焚身無處躲。山中白雲懶欲眠，棲松巢鶴皆千年。

壬戌五月初三夜，忽中風痺之疾。香山所謂體癢目眩，左足不支，與有同病焉。昔符堅得習鑿齒於漢。



南因其蹇疾裁堪半丁香山詩云漢上羸殘號半  
人是也余年已七十可以稱翁因自號半翁紀之  
以詩

半翁肢體已冥頑詩酒閒情未忍刪卅載心傾長慶集誰  
知病亦學香山

當日飢驅走晉秦半翁早歲卽風塵誰知一副幽燕骨化  
作牀頭廢棄身

四壁懸將新畫本紙窗竹屋盡煙雲半翁身在煙雲裏鎮  
日卧游宗少文

和自解原韻

自學詩來五十載久將白傅奉爲師一千年後憐同病病  
裏依然日詠詩有句直須早傾吐夕陽紅影不多時

真於九日作

忽忽又重陽急景乃如許清爽滿城秋無風亦無雨猶憶  
八月中水深沒階礎靡日不淫霖匝地無乾土豈獨辱泥  
塗兼亦傾環堵晴來近兩日籬菊花全吐莫放晚節過好  
把中秋補煮酒復題糕謀歡恣笑語某寺及某墟樓臺心  
暗數相約共登高先期命儔侶跋鼈足不支傷禽徒自苦  
向往豈無心心雄趾難舉平地尙趑趄陟級尤艱阻暮齒  
病纏綿摧頽固其所笑謝眾賓朋逡巡仍獨處蕭然斗室  
中一身對二豎

偶感

牡丹傾國色幽蘭衆香祖人間極品花凡卉非其伍我爲  
長太息位置不得所牡丹蒙穢塵幽蘭插糞土空負此美

名無人爭快睹天意茫茫不可窺後先矛盾乃如許既予之以色與香胡又令其遭際苦不受沈香亭北風不沾空谷叢中雨可憐憔悴過一生不及羣花隨意吐乃知穢塵糞土中埋沒英才不可數吁嗟乎此恨同今古

李枝青字蘭九號薊園別號西雲福安人道光壬午舉

人厯官乍浦同知有西雲詩鈔

詩話西雲治經績學勤求經世之術集中感慨時事雅近杜陵又常擬謠詞曰使門守盜乃爲盜資使嫗乳兒乃令兒飢刺牧病民也曰山高林密蛇舞學龍欲告雷霆厥道何從憂世亂也曰美人居家海上神山我有香草天高風寒志潔身也又詩云抱瑟歸去來惡聲終不出故獲咎而無怨尤薛時雨甚稱之

同李筠舫

汝霖

羅沁吾

源一

黃肖山

世俊

游葛嶺

直擬松顛叩寺扃天梯九十二層經僧披宿霧開精舍人御罡風立畫屏湖影一痕浸城郭江聲三折下滄溟依然

明臨泉言圖卷一百三十一  
十一  
偉觀成終古誰向山椒再築亭

初陽臺迥出煙霞後樂園荒噪亂鴉仙令飛昇仍有豕相  
公賜第竟無家閣光蘸碧巖圍竹雲氣蒸香鴨焙茶山有竹閣

元關寶雲茶

賸有蘇公遺刻否重來石壁剔苔花

四月三日到臨海縣

亂峯飛舞下天台勒住重巒百雉開白鶴山衝雲氣起金  
鼇濤拍海門來越王土宇連天盡徐福帆檣幾日回擬躡  
括蒼高絕處青煙一點望蓬萊

前瞰靈江後枕屏章安鎖鑰控東溟樓臺晴壓蠻煙溼城  
郭朝浮海氣腥潮上魚鰕羅市白雨餘筍蕨出林青比鄰  
吾土同風物莫把華胥夢便醒

觀山秋眺



破曉秋光潑眼鮮  
俯窺鯤壑立霞巔  
輕煙一點扶桑島  
涼籟千山落木天  
劫火纔燒亭畔佛  
引風還望海中仙  
老僧遙指驚濤外  
認得歸來日本船

張培金字生洲信陽人道光壬午舉人官麻陽知縣有  
望山詩鈔

曉過東昌

破曉征車發如龕  
坐未安野平風力大  
霜重月光寒老樹  
棲烏穩危橋度馬  
難遙知花信好春  
在五雲端

袁翼字穀廉寶山人道光壬午舉人官玉山知縣有邃

懷堂詩鈔

詩話穀廉宰玉山寇至李次青廉訪元度方帥師援  
浙請留禦寇城賴以全詩以工秀勝晚蓮亂離漸歸  
蒼老亦工爲駢文門人  
高安朱齡爲之箋注

呂城

阿蒙城址長蒿蓬依舊江流日夜東  
遠岸樓臺殘月下嚴更鼓角亂  
山中爬沙大蟹時穿斲撲火秋蟲  
誤打蓬歎息荆州人熟睡白衣穉  
子竟英雄

舟中立夏日示章寶笙同年

吹到炎風十里潭嵐光潑墨水拖藍  
鄉音有客同吳下春夢無聲別嶺  
南茉莉香薰新苧袷櫻桃紅入小筠  
籃木魚歌裏漁郎飯祭竈今朝餉麥  
蠶

崖州寇萊公祠

獨有乖崖老能知天下才六軍孤注  
險萬里逐臣來池上星猶隕牆陰竹  
徧栽廟中今報賽蠟淚又成堆

崔光笏字正甫號蕙田慶雲人道光  
壬午舉人有蕙田

草

早行

野店無更鼓烏曉夜欲闌遠鐘催客起斜月照人寒樹密  
知村近沙平覺路寬行行天欲曙曉日出林端

韓鼎元字象也號草亭掖縣人道光壬午舉人有草亭

詩藁

黃土坎

亂山合沓不容車路入窮鄉亦可嗟於菟窺人渾似犬羝  
羊分乳便名茶風聲悽楚禽嘒樹野色荒涼草戴花落日  
亭亭何處宿危巖寂寞幾人家

朱世重字石亭峩眉人道光壬午舉人有峩秀堂詩鈔

荆門州

全荆門戶仗荆門荆水荆山向北奔地削九州開半壁天  
催一氣到中原十分人物三兵役五里墩臺幾井村客有  
雄心隨道柳絲絲縷縷絆游魂

鄭民鑫字荆南臨淄人道光壬午舉人有雪村詩草

村中晚晴

兩止雲光散風收嵐氣侵斷虹穿澗遠返照入林深野巷  
鳴歸犢高枝噪暮禽村居無別樂好靜守初心

初秋偶成

荒涼館舍夏初過閒倚松枝靜養和樹果漸垂經雨重庭  
花難數入秋多佐餐時或烹葵菽憚暑偏宜著綺羅最是  
羲皇堪傲處開窗一夢到南柯

麟魁號梅谷滿洲旗人道光丙戌進士改庶吉士授編



修官至兵部尚書協辦大學士署陝甘總督贈大學

士諡文端有夢花書屋詩鈔

詩話順治壬辰乙未二科滿漢分榜甲第具備自後仍合爲一榜滿洲進士擢高第至梅谷始得傳臚後十二年戊戌靈文恭繼之同治乙丑崇文忠狀元光緒癸未壽子年尚書榜眼一百一十一科中祇此四人而文恭及子年尚書皆以宗人登第文忠本蒙古以后家丹闡改滿洲蘭錡舊族金殿傳名惟梅谷爲專美矣

驛館夜坐

驛館挑燈秋夜深  
思量旅況昔猶今  
有書莫漫途中寄  
得句何堪馬上吟  
半載消磨關塞日  
一鞭擲碎使臣心  
無情最是西來路  
老我風塵白髮侵

黃爵滋字德成號樹齋宜黃人道光癸未進士歷官刑部侍郎降員外郎有仙屏書屋集

詩話樹齋在諫垣言論風采爲一時清流領袖疏請  
嚴禁鴉片世稱讜論然發大難之端不可復收當亦  
非先事所及料詩循杜韓正軌縱橫跌宕才氣足以  
發其所學徐廉峯嘗作四子論詩圖以張亨甫潘四  
農與樹齋並列樹齋爲題有酒入章源本風騷持論  
必衷於正爲諸人所推服晚年刻集彙錄徐東松郭  
羽可艾至堂湯海秋及亨甫四農平日評  
論所及以爲自序蓋信其詩之可傳也

晚登來鶴亭同郭韻堂

瀘陽三百家攬之不盈掌炊煙眼前生須臾變蒼莽危亭  
此登陟高下一俯仰不覺城市喧但聞谿碓響斜陽下山  
盡明月向空上牽裾不忍歸惆悵東君往

登黃鶴樓

大江東去向黃州黃鶴仙人此舊游風色曉嚴猶禁渡日  
華秋靜獨登樓桃花祠外盈盈水芳草洲前點點鷗紅樹  
青山無限況且揩醉眼破閒愁

百花洲

百花湖畔百花明  
花氣冥冥湖氣清  
湖雨湖煙春漲漫  
花開花落碧山橫  
蛛絲罨檻纏綿結  
虹影迴波曲折生  
歲歲舊游攀折地  
曉風楊柳最牽情

觀音巖

船溯溟陽之上游  
峯奇石詭堆舵樓  
觀音潭水不可測  
窟宅隱隱橫蛟蚪  
嗟峨青壁一千丈  
嵌空石腹深且幽  
然犀徑入百怪避  
竅窳直欲窮冥搜  
仰攀闌檻俯躡磴  
有似枯木緣獼猴  
裘裒暗室乍若暝  
豁然天地來雙眸  
嚮者經過曾不識  
到此頑石爭點頭  
鐵釜迴穿戶眼突  
鐘乳倒挂檐角鉤  
蓮花石上老佛笑  
摩盪元氣爲我舟  
羣山拱向儼合什  
香煙一氣凌女牛  
胸中邱壑不薊蕞  
吁嗟智藥知吾不

舟泊樟樹鎮

贛波浩蕩注洪州戰蹟荒涼古樹秋嶺月帶星沈戍埃峽  
雲飛雨入漁舟市聲乍散人煙外鐙影遙明野渡頭聞說  
魚龍今退避江鄉禾稻可全收

贈別余芝衫

秋風起庭樹涼蟬聲愈繁游子命車駕催促返故山故山  
何所事蒔爾三年蘭幽芳媚空谷可佩亦可餐持贈素心  
友寶貴何可言浮雲我與爾離合無定端此別見何日常  
恐彫朱顏碧筒儻可掇勿廢盈觴歡

送張亨甫之鄭州

去夏君出都往視阿兄疾送君西門外馬鳴酸不輟北來  
已西風南歸又白雪寒烏戀慈母桓山翼已折嗟君遇未



通出處無定轍奔馳二萬里乃若旋一室神物已暗驚人  
言豈足恤天公信厚君迫使鍊詩骨豈慕貨殖賢幸乞扁  
鵲術惜無白髮兄爲君作生日天無妄金盞建華堂  
勢壓磨盤雄天河俯瞰中澗風秋咽角嶺月曉懸弓虛埃  
人煙合危橋驛騎通香泉儲萬斛欲問醉鄉翁

至德州懷徐東松暨盧魏二生

瀘谿有二生知我徐夫子飢寒不暇顧苦欲學詩史夫子  
寄我書八月章江涘答君何遲遲月冷魚山水文章出有  
神光怪豈不偉孰云草莽間終老巖穴土河流尙未冰思  
君對鮮鯉吾徒孰升沈消息無寸紙

神木歌

東府城空王氣摧萬歲山前宮殿開大木參天工失裁無  
用爲用神驅來置之東門象出震觀者峩峩詫山峻雷轟  
電裂百怪避卧理坤維作雄鎮中空外廓如枯槎剝落蘚  
石嵌風沙白晝茫茫蒼海立老龍睽矐靈蛟拏君不見有  
明中葉貂璫煽西山土木誅鋤徧又不見潢池兵燹肆毒  
痛蜀山碧血明社墟滄桑閱盡惟神木回首蒼涼泣馬湖

撫州行寄太守郭松崖前輩

羊城山宛宛半插高空半平遠羊城水湯湯其源清激流  
汪洋墨龍池上龍飛翔星辰照耀垂文昌名賢典則首陸  
晏名宦風流首謝王石人晴雨天無定金窟銀峯地寶罄  
水溯巴湘估客窮山梯閩粵征夫病黃山之山高高可種  
竹黃水之水深深宜禾疇乃有不耕之夫原上游盜筍不

足還盜牛我生之初風尙古歲時伏臘羅尊俎昔日崇墉  
足穀家今時飄泊無聊侶臨川之南龍骨渡乃是逋逃淵  
藪處爲狐爲鼠遑恤他爲虎爲狼當奈何父兄教不先子  
弟率不謹不見阿芙蓉家家鬼結磷士貧孰義學民貧孰  
義倉貧人挑鹽富人食官吏捉鹽鹽被攘安得反澆俗盡  
爲農桑民安得挽薄習盡爲絃誦人我聞顏真卿治陂灌  
田民利均又聞秦起宗儉約安靜民化淳公其邁古昔與  
民爲更新愛民之吏公其舉賊民之吏公其甄玉田氤氳  
靈谷芬側身南望歌神君

秋雨歎寄海秋亭甫

秋雨颯沓淒五更孤燈無燄樹有聲百年之憂一息集虛  
室疑有鬼神入文章鬱鬱感我腸世事冥冥幻轉睫四海

明倫彙編 家範典 卷一百三十一  
三  
知君意氣大湯生兀兀張生挫非愚自笑北宮窮有懷欲  
救霧桑餓我有破屋如盧仝秋深四壁愁雨風杜陵怊悵  
萬間厦此願恐付虛無中湯生家潁陽潁陽之水橫披猖  
張生來燕市燕市米價亦騰起無田可耕祿可養白雲高  
高悵南望君乎與我同寂寥黑頭那得取卿相西望翠微  
山山中泉石何蕭閒我有夙約竟孤負終夜漫漫坐愁歎  
張生三日游未回湯生咫尺亦不來眼中之人生我哀昨  
者珠玉今黃埃吁嗟萬事乃如此日月遷流枉悲啼明朝  
秋霽堪登高安得痛飲中山醪

癸巳中秋次韻答陳潤珊并示江南留京諸子

唳鶴一聲來遠皋  
羈人爭不夢魂勞  
已憐束縛非吾志  
安得馳驅更爾曹  
帝女河橋終寂寞  
嫦娥月殿自清高  
卻愁



天末浮雲蔽冷雨，催成點客袍。  
江南幾輩昔知名，未必文章愧長卿。  
客去蕭然瓊島夢，水流淒絕玉河聲。  
匣中古劍疑龍化，衣上浮塵逐馬生。  
頗似晨星三五點，因依北斗不勝情。

太行秋色來天外，長嘯江亭一倚欄。  
咫尺尙難招好友，逍遙何處揖仙官。  
揮戈漫見陽烏返，挾瑟空憐夜月彈。  
廩粟虛糜竟何似，瓣香慚愧爇詩壇。  
要從出處見眞吾，澄澈冰心貯玉壺。  
朋友多情誰管鮑，師生無負卽歐蘇。  
觀書燈下眼如月，待爾花時酒滿觚。  
莫歎儒冠誤秋鬢，他年勉力共鵬圖。

不見

不見鄉園又十年，白雲紅樹意茫然。  
南華峯外科陽路，誰

看黃牛抱犢眠

喜郭羽可至京

太息風塵老郭隗夕陽瘦馬又燕臺詩聲疑挾黃河至畫  
意添將紅藥開四海交游幾兄弟千秋事業一雲雷天心  
莽莽終難問賴爾雄譚佐酒杯

山西行送陳潤珊竝寄李榆村刺史

山右古陶唐之遺我歌唐風鬱以思近者乃有伏牛之里  
舞羊澗若燎旋撲嗟旣靡千載李韓不可作并州萬族將  
誰託賴爾循良荀與郭方今中外久一家雁門日落無風  
沙但使粟城穀山不告竭何用秦壁趙壘相矜誇陳生四  
載燕市客論文與我共朝夕秋風送爾有寒色寒亦不足  
畏熱亦不足欣此意孰相識今有忻州李使君若過尹鐸

祠前路還訊薛雲谷裏春

二月二十六日招葉筠潭前輩郭羽可艾至堂蔣子

蕭張亨甫朱曉山小集江亭

孤亭遙對翠微彎  
嚮夕風狂坐掩關  
冀北才多天下駿  
江南春在夢中山  
杏花淺白人初醉  
柳葉深青燕未還  
何處飛雲齊引領  
甘霖三日洗塵寰

趙北口

十二橋頭落月斜  
老漁炊火傍蘆花  
鷗鷺瞥向波心起  
銜得紅鱗上釣槎

長夏無事偶檢十餘年來師友翰墨得十卷裝池之

因成七律一首

如將海嶽貯胸間  
永晝披尋得靜閒  
琴絕有時悲逝水  
花

開頻想折春山蕭條風雨成離合浩蕩乾坤寄往還最是  
關懷勤策我不堪攬鏡髮將斑

吉明字曉帆滿洲旗人道光癸未進士歷官內閣學士  
降葉爾羌參贊大臣有學愈愚齋詩草

忠武廟前鐵人歌

頑鐵頑鐵殊不屑鑄就奸臣受挫折道旁來往無限人只  
罵奸臣不罵鐵獄成三字天地悲東窗祕語終教世吁嗟  
乎千載而下長惡名榜罪階前跪霜雪

雪後望西山

燕城西望盡峯巒雪後山容更改觀玉樹高擎破空碧晶  
屏遙列逼人寒光迎曉日浮嵐溼色混晴雲擘絮殘此境  
雖非真面目也能爽氣豁眉端



雷以誠字春霆號鶴皋湖北咸甯人道光癸未進士由  
刑部主事歷官光祿寺卿有雨香書屋詩鈔

渡揚子江和黃樹齋少司寇原韻

一鏡波涵兩點山幾番新漲泮孱顏人行短笛漁歌裏春  
在垂楊暮靄間落日猶憐飛鳥倦疎鐘惟報老僧閒南風  
儻得催歸棹第一泉甘飽酌還

重經山海關寄黃樹齋同年

逐隊輜軒瞬十年使車重度意愴然樓頭風景懷騷客海  
內才名已謫仙拓我胸襟歌楚調思君面目夢廬巔從今  
莫問囂塵事好趁閒情學樂天

池生春號籥庭楚雄人道光癸未進士改庶吉士授編  
修歷官司業

詩話劉奇庵主五華書院齋庭與呈貢戴涪古村雲  
州楊國翰丹山昆明李於陽即圍戴綱孫雲帆為高  
材生嘗合刻其  
詩號五華五子

### 重游華亭寺

華亭深處已題名今日登山屐更輕石氣成風吹海立松  
聲似雨雜潮生泉通幽澗茶煙溼雲護深林鶴夢清猶有  
元朝舊碑在土花空映晚霞明

湯鵬字海秋益陽人道光癸未進士歷官戶部郎中有

### 海秋詩集

詩話海秋負經世才初自郎曹直樞府旋入諫垣以  
言事復遷郎曹值海疆多事屢有所論列年甫強仕  
遽卒於京邸曾文正及姚石甫邵位西諸君皆深惜  
之詩淋漓酣暢言必斷於盡意不規規於格律如其  
人為

久不得家書

鮮鮮躑躅花得得粟留聲膝前四兒女競作嬉春行焉知  
我心深憂愁不可名瘦妻拭几席羅列酒與蔬有酒我不  
飲有蔬我不茹達旦我不寢繞屋百匝趨我自離父母悲  
歡向誰道歲月日已深衣裳日已槁骨竒行路難詩富黃  
金少至哉我父母黃金非所禱

誰謂江海深不知涕淚多誰謂長安樂愁思當奈何長安  
多貴游駿馬橫經過晨朝銅龍門夕醉玉山阿可憐湖湘  
子十日九不起問我何所憂問我何所喜昨夜夢娟娟尺  
素剖紅鯉覺後乃微茫愴恨殊未已憂喜兩循環故故回  
我腸有懷不可訴獨坐增徊徨

### 喜雨

端居想氣數積久多繁憂歲歲火雲舉村村兒女啾但聞

明詩彙言卷一百三十一  
井里空不見禾黍稠年荒議論雜心微涕泗流步出自西  
門好雨從東疇菜甲行可摘稻花靡不抽三輔多稼穡此  
外吾無求

雲興何山頭雨歸何澗底焉知造化功但見郊原美藹藹  
黍稌興離離婦子喜旣懽耕者情亦完仕者理哀哉醉飽  
中感召其有以得雨且悲歡觀稼宜終始往問力田翁一  
雨甯足矣

今夕行

今夕何夕秋風發川水欲冰山見骨老蟬啁啾著樹乾瘦  
蝶伶俜撲窗突秋風於汝意云何嗟我與汝本殊科牆上  
之蒿不可倚莖枯葉脫無回波

今夕何夕秋草凋結根失所成蓬蒿階下決明獨顏色庭



前白菊孤丰標青袍腐生呵護汝無那秋風復秋雨願移  
太古陰崖巔風雨不到長延佇

今夕何夕秋月白河漢迢迢情脈脈天上雙星太纏綿人  
間一劍獨躑躅身無羽翼凌天閭投壺玉女難依傍短飛  
齷齪勿復道蟾蜍知我之心腸

寄陳松心

神交未謀面天遠一思君詞賦無高第江湖有白雲芟荷  
堪作壁鷗鷺自爲羣落落幽期處人間聞不聞

喜陳登之別駕到都

秋色滿天地君從何處來風塵趨走日淮海轉輸才驥足  
空餘子燕山有舊杯相逢心款款離合兩裴回

贈張詩船觀察

四月南風發飛騰見使君劍吹關塞霧衣雜海山雲輪輓  
誠餘事崢嶸故不羣卽看宣室召天語豁殷勤

閉門

不貪人事與侵尋薄宦聲名悄至今一雨放春楊柳綠百  
年如夢屋廬深才能受謗有餘福詩不閉門無苦心幽鳥  
幽花吾肺腑市朝深處得山林

南鄰

莽莽天涯寄此身風流來往側烏巾攤書跌宕雲橫几挾  
句推敲月趁人梨棗均勻兒女大酒肴澹泊歲時新天真  
爛漫知何似杳杳桃源物外民

訪陳筠心

酒力如山百感平非狂非聖一迂生未成四十元爲福便

說林泉似不情埋照汝應師阮籍  
啖名吾亦笑黃瓊短車  
破帽長安道憔悴人間吏隱并

過方稼軒故居

馬上東風涕泗滂酒酣拔劍憶王郎  
一官潦倒存儒素萬  
卷飄零付夕陽陋室苔痕悲劍履  
元亭草色怨滄桑不知  
黃鳥緣何事飛繞闌干百轉長

幽州九日

滿把茱萸當采薇天涯九日淚斜揮  
登高怕見南飛雁人  
自傷心雁自飛

沈濂字景周號蓮溪秀水人道光癸未進士由刑部主  
事歷官江蘇淮徐海道有蓮溪吟藁

雜詩

明齋集言圖卷一百三十一  
黃雀常栖栖卑居依四壁朝飛去不遠日暮還歸息紛紜  
長兒子飲噉聊自得爲我語黃雀汝居何偏仄曾不志干  
里慙媿傅雙翼黃雀翩然起屏營對以臆造物賦形小遠  
舉無氣力亦知烏有鵬圖南非我職願言終簷端簷端信  
樂國風雲卽無時鷦子不我擊

神仙行處有亦不避塵喧咄哉劉子驥求之未有門遠近  
以地別靜躁由中存貌余視天地肫然猶黃軒禾黍熟井  
井雞犬歡村村室有琴可絃廚有酒可尊淵明儻復作何  
地非桃源

復與弟飲因憶少時文酒之樂今褚菘塍國錄

長春

吳和村二尹

應和

吳思亭別駕

修

浦又垞明府

日

楷

胡仁圃孝廉

祥麟

徂謝久矣感而有作



劉伶嗜酒頌酒德此中真意猶未識荷鍤青山隨處埋如  
何不葬陶家側吾曹劇飲自天性少喜酣呼老猶盛糟邱  
麴壘縱酒兵潛虬玉柱喧觴政古人樂酒開芳宴無故興  
嗟幾相見歡娛痛醉極淋漓感慨悲歌多眷戀蠟花搖搖  
夜迢迢此時侑坐非管簫長吟擊節殊錯落短髮顧影霜  
飄蕭杯行到手莫停手少壯交游今在否墓門喬木半蒼  
煙昔年跌宕同文酒酒酣意氣皆千古春夢無痕渺何許  
眼前有酒不自醕後世誰澆趙州土

錢味根明府

聚仁

移居

吾愛錢郎早解簪如魚歸壑鳥還林香爐穩送通明宅紙  
閣微聞白傅吟晝讀書多宵夢古幼交朋密老談深結鄰  
笑我空留約未遂雲山一片心

處處

處處征輦老自嗟漫隨年少對韶華  
鱖魚流水桃花活燕子春風柳絮斜  
藉草壺觴皆上客畫船簫鼓又誰家  
太平樂事何曾欠瘦策寬鞵步輦沙

殘更

感舊懷人百慮縈夢回酒醒坐殘更  
窗紗月落燈油暗慣聽晨鴉第一聲

徐盛持字夢笙奉新人道光癸未進士  
歷官龍州同知有寸草軒詩存

九日偕龔漚舸郭小巖門人范生問庭  
蕭生含素唐生雲溪王生清如游青原  
山登高席間分韻得來字次山谷韻

平生抱山癖人事攫氛埃名山多負負到處空復回登高  
訪青原盤紆白雲隈岡巒互局鑰深入豁然開巍巍淨居  
寺殿閣森良材佛家亦興廢今昔良可哀躡屐徧探幽言  
尋山水涯嶽嵒磊落石飛雲絕梯階亭臺半傾圯結構無  
文棧泠泠曲礪泉清不受塵埋聽泉待月橋道心生秭垓  
天工勝人爲此理詎疑猜我聞王姚江講學辨根荑聚徒  
居此山歲舉春秋杯書聲振林谷相得遺形骸千載杳難  
期五賢祠已摧吾道竟何如後學誰追陪講堂不可再俗  
僧徒掀脰弔古感蒼茫猿鳥聲清哇人傑地乃傳我今七  
賢偕重陽無風雨歡攜酒榼來捫蘿意延佇日暮輿夫催  
何時買山隱歸路重徘徊

螺墩偕同人宴集

重向螺墩載酒過桃花人面復如何琵琶聲咽瀟瀟雨環  
珮魂消瑟瑟波天亦有情容客到人能無恨得春多逢場  
作戲尋常事肯爲簪纓易薜蘿

幾度看花泛畫船三村畢竟負花緣舊時桃李猶能笑此  
會裙釵亦是仙山色微開新雨後波光緩趁晚風前城樓  
鼓角聲聲徹回首江城起暮煙

朱蔚字子藍海甯人道光乙酉舉人官工部主事有盟

### 蘭山館遺稟

詩話子蘭幼學能詩爲徐惺菴侍郎所契詩標格雋上婉約和平古體尤勝

### 春寒曲

鶯聲流入鎖窗裏喚醒香魂慵未起幾度東風作峭寒梨  
花如雪春如水屏山曲曲畫愔愔冷淡韶光轉不禁楊柳



萬條披弱絮海棠一樹冒輕陰鑪煙裊字垂珠箔美人舊  
住三層閣曉妝試罷著春衫猶怯銀泥裁太薄經年遠別  
隔天涯離愁如影常相隨不堪桴楸煨殘夜淺夢重簾織  
雨絲

孔憲彝字敘仲號繡山一號韓齋曲阜人道光乙酉舉  
人官內閣中書有對嶽樓詩錄

王秋垞子梅攜酒見過同酌黃葉堆中

黃葉忽搖落秋風舉碧帷青天月初上照我舉杯時清景  
此相惜高歌應不辭明朝庭樹下還約酒盈卮

闡中與張亨父同號舍喜贈

盡日望不至相逢此最奇幾人爭問訊怪爾竟來遲海內  
詩名盛貧中病骨支城南天尺五好醉晚春時

戲簡湯海秋

浮邱先生詩中仙錦囊萬首人爭傳興酣落筆一萬字長  
河倒瀉驚奔泉閉門忽復厭高詠一百五日無新篇立言  
奮起諸子後天人物理留眞詮挂名君家詩集裏用蘇句三  
年懷袖心拳拳小册乞題徧海內青蓮詩意誰爲傳得君  
奇句寫狂態聲價十倍應無前短札索詩手相報許我破  
戒吟蒼煙是時新雨始澄霽夕陽紅上西山巔拓窗高閣  
硯含潤詩情定與花爭妍願君吟成爲親寫腕底徧疆盤  
蛟蜒焚香掃地且相待一披詞翰驅塵緣

張小圃學使以重刊秀野堂本韓詩見貽賦謝

平生尊韓公夢寐每若見學詩名吾齋古本寶李漢側想  
秀野堂苦心事摩研精本世罕求日久或漫漶嘉惠重開

雕朱墨何璀璨流傳貴有人欣復歸使院我登文海堂獲  
此劇歡忭蓬窗日吟誦客路消午倦竊謂公文章流派實  
淹貫光焰萬丈長已導歐蘇先尋源共追溯烏能得涯岸  
性情得所近學焉志吾願拜嘉多餘珍此惠實所冠

張詩船方伯以伏波銅鼓送焦山寺中作詩紀事依

韻和之

寶氣夜上貫東斗蛟龍拜舞江聲吼無人知是銅鼓來但  
訝虹光滿戶牖此鼓流傳自嶠南伏波將軍手親叩班爛  
古色青且蒼神物猶存千載後張公得之桂嶺西萬里攜  
歸達江口草堂藏弄多吉金獨此神奇寶永久興至摩挲  
日千百詩成落筆驅蛟蚪忽思位置焦山巔逕買扁舟載  
之走雁堂有鼎屬定陶諸葛鼓左此在右

阮芸臺太傅張  
芥航河帥先以

漢定陶鼎諸葛  
銅鼓置寺中  
昔染蠻雲瘴雨寒  
今依佛火禪鐙黝詞壇

歌詠詩人豪  
寺門鎮壓老僧守  
千秋雅舉傳名山  
真州延

安同不朽

贈包慎伯明府

材大難為用  
垂垂七十年  
此懷自飢溺  
餘論總流傳  
入品書真聖  
多情句欲仙  
白門游已倦  
高卧對江天

黃文琛字海華  
晚號甕叟  
漢陽人道光乙酉舉人  
歷官

湖南候補知府有思貽堂玩雲室諸集

詩話海華以乙科官成均  
政外為丞倅游歷郡守宦  
蹟所至山川風物之勝  
簡書期會之勞悉於詩  
發之古體勝近體七古  
又勝五古體製學眉山  
長篇短什皆有浩浩落  
落之致而字字必經洗  
鍊而出所謂成如容易  
卻艱辛異乎近世學宋  
詩者以亂頭粗服為能  
事也

涼夜檢理舊書感賦



少時不願輕去鄉讀書願罄家所藏閒從鄰好乞善本手  
鈔夜闌燈燭光亦知力索乏真味不解癖嗜長恩忙丹黃  
紛藉染十指籤帙散亂堆滿牀乙科誤人再奔走浮雲改  
變家業荒飢來驅我苦無暇安能捆載隨輕裝遠函復報  
遭水厄敗垣毀室同悲傷陽侯豈其愛文字如此豪奪真  
猖狂河北歸來迫冬盡蒸暴鎮壓收流亡頻年浮蹤今暫  
息十僅其一充行囊今夕何夕幸無擾檢書未竟心彷徨  
舊墨過眼了不識驚回斷夢春茫茫人生誦讀亦有命何  
殊金紫登朝行百不如人恃有此疊經催折成老蒼素纈  
欲動林風靜淨月橫斜窗月涼呼名肅拜酌杯酒長思鑒  
我非相忘

清明

淡淡湖風弄雨絲  
紙灰飛上綠楊枝  
三年不過歸元寺  
腸斷清明上塚時

傷歌行

朱門日出鎖未開  
內批已遣金吾來  
驅逐婦女出門走  
驚妝欲竟頻相催  
屋屋檢視誰復問  
大索十日收貲財  
膏田連棟不可算  
吳綾蜀錦紛成堆  
深藏寶賂發光怪  
海物充積高崔巍  
以車曳載入內府  
街頭雜沓奔如雷  
賓客逃避家僮散  
相公始自炎州回  
番禺珠翠果何有  
愁腸軫轉心寒灰  
小侯寄食長不飽  
妖姬掩袖嗁紅腮  
夢中旌纛猶在眼  
銀鐺夜半聲喧阗  
中朝達官忍棄我  
風簷慘淡私徘徊  
浮雲變幻亦常事  
如此顛折非人災  
門前一雨生莓苔  
親戚嗟歎行人哈  
不記手扶大河水  
魚龍饒嚼天爲哀

九月同琉球鄭生

學楷

赴通州作

西風送鈴馱初日浮古塵王事莫敢息于役偕遠人海藩  
被恩信濟濟來成均私懷屢得請不愧觀國賓黃花酒已  
熟吹帽值佳辰程期限公牒僕隸曠且呻安知余蓄念瘡  
痍軫邊垠三載警烽檄犬羊昧尊親嘉爾篤忠孝厯險歸  
我仁附枝無曲木同轍非異輪漢德優旣渥景命終古新  
永永爲外捍不在輸奇珍學省延國胄所期化益溥凜然  
效一職去矣無苦辛

擬贈晉江御史陳公

慶鏞

皇帝二十有三祀歲在癸卯月建巳萬人一口呼太平歡  
動朝廷眞御史御史獻言職所司以言得罪焉敢知傷威  
縱敵憤所切高位可復貪庸尸一封朝奏天子聖貴人慘

明時義言匯卷一百三十一  
三  
懍驚名姓我皇大度古來無特蒙褒許更成命愛公宿學  
慕公久心傾此事尤頰首公昔釋褐歲壬辰九重憂旱求  
直臣謇辭論列劉給諫光三先賢後哲同超倫眼中再見  
朱雲人延英但少張將軍魏公斌媚作何語沈沈溫室不  
可聞公身決爲當世用公文豈獨吾曹誦更須湔剔謀本  
根廓清六合安鸞鳳

送福同年涪復宰關中

君居巷南我巷北三年不識思顏色古槐花寺始逢君快  
然所見溢所聞座中無限青雲客與我並坐情相親歎息  
魯國一杯水大魚潑刺赤其尾三揖一辭了無難古來賢  
者類如此煙鴻哀叫秦雲秋桑柏彫悴使人愁天子臨軒  
簡良宰嚴程赴隴不我留會遲別速傷如何感君執袂情



獨多我懷徑敢向君告莫以前非悔年少好風吹送來晚  
歌我爲蒼生向西笑

復至德山

日日來看江上山居人笑說使君頑使君無事且樂此尙  
恨爾來腰腳孱東華旅食逾十載緇塵滾滾人如海鄉夢  
迷離意常醒捫胸邱壑依然在此邦水與山俱清我未來  
時熟其名故交四方不可合江雲嶺月知我情

舟過德山爲留半日

今日何日飽看山山色落我船窗間定知山靈獨笑我閒  
官何事身不閒舟子催促莫久住此間未是收帆處涼波  
疊碧天已風沙禽突破秋煙去

白馬渡

明倫彙編 家範典 卷一百三十一  
三十一  
哀猿暝嘯江上山山雨滴綠綠滿船六月單衫坐篷底細  
數雪鷺衝涼煙溪迴柁轉更清絕誰構亭子山之顛衰俗  
踵事好奇詭曾見幾人昇青天桃花不開石門閉杉筠長  
大藤鉤連瑣窗朱閣夢何所書生浪賦秋月圓吁嗟在昔  
滅州稅追留白馬真能賢歲久無復記遺愛荒唐此地誇  
神仙好風吹送不得住我亦有累難息肩芒屨布襪定何  
日到處自辦游山錢

發德山

割麥天氣江流黃沙灘漸沒五尺強鼓師弄手百夫唱竹  
索倒拽船低昂回頭看山在林杪孤峯一角浮圖小畫旗  
飄揚風轉腳羨煞估帆去如鳥朝天路遠六千餘堂堂歲  
月閒掃除遙與山靈結後約再來顏鬢知何如

枇杷

故人惠我黃金丸，駢蒂森梢堆滿盤。可喜荒郡亦有此肺  
枯甘沁靈漿寒，建業蠟兄名最久。山南舊事依然否，飽啖  
佳果轉生悲。揚州舊夢黯回首，畫船簫鼓高。夏雲嬌喉喚  
賣風吹薰連江戰，壘人骨白明月不知今幾分。

下灘

溪神試我老膽勇，夜召風雨故驚悚。巖垂壑沸豪秋湍，地  
機騰激晴雷洶。船頭半沒船尾高人與伏鱗，共飛踴濺衣  
及屨自安坐。一木擺撥羣力捧，篙工脫險乃大笑。竊臆使  
君得毋恐，豈知倔强性所成。莫以危疑震衰冗，慣看世態  
等鴟嚇。嫉邪未敢悔，前踵綠潭箭。下平如席搜奇早，已詩  
肩聳。

抵武昌

朝發簿洲頭暮泊鮎魚口江山不復識牢落戎馬後故鄉  
昔殷富狂寇屢芟蹂焚殺一何慘兵氣尙纏糾警燹自東  
來彩鷁壯屯守荒忽幾疆吏喪地某至某泄泄今七年未  
滌豺狼藪酸涕強西眺此心更何有敝廬蕩無存親舊睽  
離久煙火自蔥鬱新屋十八九餘息驟難蘇疲俗終安否  
殘妖決可掃顧影念衰朽從來據機軸是賴活人手制勝  
非有他臨事毋一苟亂霞明高堞秋色澹霜柳對此風物  
殊愴然低白首

余正酉字秋門厯城人道光乙酉舉人官平陸知縣有

秋門詩鈔

詩話盧雅雅雨纂山左詩鈔書成於乾隆間嘉慶中張  
南崧鵬展視學是邦復爲廣續秋門與校勘之役嗣



又踵編後集附自作於後並取朋僚投贈壽言羸列  
卷末選詩每苦詩人仕履不易搜輯若秋門所爲正  
未可厚  
非也

送友人赴粵

此去投誰是飢驅路幾千  
晝昏梅子雨秋老荔奴天  
八口愁生計孤帆入瘴煙  
明湖春柳色相待憶年年

題柳田郊居

結茅依近郭高卧對南山  
竹院無人到松亭有鶴還  
蓬蒿三徑合風雨一廬閒  
案上新詩彙重看每自刪

朱駿聲字豐芑號允倩元和人道光乙酉舉人官揚州  
教諭有傳經室詩存

詩話豐芑篤學闇修著書九十餘種多未付梓說文  
通訓定聲一書於咸豐間曾進呈乙覽賞國子博士  
銜詩以詞采格調勝不雜經生一語初學温李綺錯  
婉媚麗絕當時後則專學東坡恢廓縱橫有筆掃千

軍之勢

龍井

毒龍何年來潛此深淵中  
虛崖噴流雪驚湍寫長風  
下插石崕崕上擘天鴻濛  
白雲有時飛恰掛巖邊松  
我心隨白雲舒卷無始終

客中七夕

辛苦驅鈴馱長亭復短亭  
去家經兩月入夜看雙星  
積雨汝流白浮雲泰岱青  
客衣誰遠寄預戒早霜零

鳳皇山弔宋故宮

回首昆明已劫灰  
湖山終古夕陽開  
但教師擣黃龍去那  
有江橫白雁來  
寶氣盡隨妖霧散  
風聲猶送晚潮迴  
汴京宮闕同禾黍  
南渡君臣儘可哀

蜀鏡詞

蟾蜍蝕盡瑤臺月對舞時間鳳鸞泣可惜青青一片銅不見當時好顏色三十二字伊誰銘背蟠細紐魚螺紋祇可涵來綺窗影莫教飛入天雄軍芳林園裏歌聲改花柳于今竟安在只有明珠出匣中黃昏仍下山精拜我欲摩抄一問之傷心杜宇夜深唬千年金鏡照家國可照當眉寫

翠時

記錢武肅王水府告文銀簡

其文云大道弟子天下

吳越國王錢鏐年七十七歲二月十六日生自統制山河土臨吳越民安俗阜道泰時康市物平和遐邇清晏仰自蒼昊降祐大道垂恩今則特詣洞府名山徧投龍簡恭陳醮謝上答立恩伏願合具告祈兼乞鏐王申行年四時履歷壽齡遐遠眼目光明家國興隆子孫繁盛志所立祝允協投誠謹詣太湖水府金龍驛傳於吳越國蘇州府吳縣洞庭鄉東皋里太湖水府告文寶正三年歲在戊子

三月丁未朔二十六日壬申投簡長  
五寸六分廣三寸七分銀質重二十兩

順治紀元吳大旱太湖龜坼湖底見耙沙銀簡蟠龍螭長  
六寸許廣半之其質權衡二十兩鐫字毫釐會不爽一百  
七十有九文硬黃可拓於今存文言大道弟子天下都元  
帥吳越國王時年七十又七歲二月十六日誕生統制山  
河時康平蒼昊降祐神垂恩特修龍簡恭醮陳乞鏐四時  
履歷遐壽齡眼光明無疾疢家國興隆子孫盛志祈立  
祝相投誠太湖水府當沈璧告文傳自金龍驛蘇州吳縣  
洞庭鄉東皋之里神昭彰未以寶正三年歲戊子三月二  
十六日壬申紀此揭藏諸謙六君秀水楊氏名大炘吾家  
世世居吳門亟書厓略識舊聞

醉時歌



人生百歲亦草草安得黃金鍊丹早閉門兀兀空著書不  
飲那知酒杯好昔有劉伯倫死便埋我全其真後來誰續  
酒德頌我識世間無酒人春風二月開桃花緋緋一樹蒸  
紅霞芝田種秫釀新熟高興肯讓麻姑家醉後看天大如  
斗左手擊鮮右手擊缶行樂安能千萬年倏忽浮雲變蒼  
狗我悲東園公山人勸酒依青松一朝爲漢出山去功成  
胡不歸山中我愛李青蓮長安市上白日眠清平樂章帶  
醉賦歸來捉月滄海邊古人已往今人來天地自築糟邱  
臺不能讀破書萬卷何當鯨飲傾千杯吁嗟乎人間日月  
車輪馳蓬萊仙人不可知酒星墮地酒泉竭丹砂亦有駐  
顏時

黎愷字子元遵義人道光乙酉舉人官開州訓導有近

明時雜言卷一百三十一  
三  
溪山房詩鈔

山齋夏夜

孤吟竟何待坐久衣袂涼不覺月華墮但聞風露香殘螢  
度高樹宿鳥棲叢篁吾生本淡泊觸景興彌長

管同字異之上元人道光乙酉舉人有因寄軒詩集

詩話異之少孤貧其母鄒育以長姚姬傳比部主講  
鍾山異之與梅伯言稱高弟傳其古文學異之嘗為  
書論風俗積貯又言洋貨日至中國國財安坐而輸  
於異域其為害尤深人服其遠慮詩朗峻兼有蘇黃  
勝之

題汪孟慈禮堂授經圖

儒林有丈人學究天人奧通眉舉明經遽赴玉樓召於時  
詢童烏芳齡始踰悼客來執詩問瑟僦了義妙文人厄九  
命後嗣終食報宦達何足言持身等圭瑄繡衣爭國論彩

筆迹庭誥鯉庭舊聞存伊今洵克做嗟子廢蓼莪哀思正  
同調寸草腐無稱辜負春暉照承君猶不棄示我圖中貌  
努力振家聲相期在忠孝

張琚字子佩黔西人道光乙酉副貢官開泰教諭

十柏山房燕集用吳澈翁游東山韻呈姚伯山太守

柬之

麤麤十柏擁蒼屏敲枕幽香入夢醒禁體成詩浮大白餘  
情調鶴坐深青爲耽野趣頻邀月況有新篇繼聚星暫挽  
高軒還小住畫圖擬作醉翁亭

山齋夏夜

山齋夏夜

風吟竟何待坐久衣襟涼不覺耳聾重但聞風簫香殘

高神歌休由畫圖辨新翰徐亭相獨景與彌長

謝蕭騎坐碧青風裡津城賦戀且與存祿諫錄星

謗珍十林對蒼翠林幽香入夢顯禁豔劫荷野大

東文其為苦尤深八殿失建感詩

計山氣燕巢風吳塘餘波東山歸呈掖帥山大江

謝聖宇子庸繼西人散於了西隔貢官開泰外館

夜我遊寒聲林際亦忠崇迺眉舉明經處赴玉樓名

同屬七草謝雅羅華負春朝照海香蘇不棄衣舞圖

晚晴詩匯卷一百三十一終